

პაკისტანის თაღიბანი

საქართველოს სტრატეგიის და განვითარების ცენტრი (GCSD) არასამეწარმეო, არასამთავრობო ორგანიზაციაა. ჩვენი ძირითად მიზნებია: საქართველოს ეროვნული უსაფრთხოების უზრუნველყოფის ხელშეწყობა; ქვეყნის ეფექტიანი და დემოკრატიული მართვის პრინციპების განმტკიცება და ქვეყნის მდგრადი განვითარების პირობების შექმნა. მიზნებიდან გამომდინარე, ჩვენი საქმიანობა მოიცავს: კვლევას, მონიტორინგს, ადვოკატირებასა და სხვადასხვა საგანმანათლებლო პროექტების განხორციელებას. ჩვენი ღირებულებები ეფუძნება თანასწორობის, ადამიანის თავისუფლების, პატივისცემის, ანგარიშვალდებულების და გამჭვირვალობის პრინციპებს.

საქართველოს სტრატეგიისა და განვითარების ცენტრთან არსებული ტერორიზმის კვლევის ცენტრი არის პირველი ქართული ორგანიზაცია, რომლის მიზანია ტერორიზმის, რადიკალიზაციისა და ძალადობრივი ექსტრემიზმის კვლევა და ამ ფენომენებთან დაკავშირებულ საკითხებთან მიმართებაში არსებული ცოდნის ნაკლებობის შევსება. ცენტრი საკუთარ მისიად მოიაზრებს შექმნას იმ ტიპის პროდუქტები, რომელიც სამომავლოდ საქართველოში ხსენებული საკითხების უფრო სიღრმისეულ კვლევას შეუწყობს ხელს, ასევე დაეხმარება ამ საკითხების მოქმედ მკვლევარებსა და ამ მიმართულებით მომუშავე პრაქტიკოსებს.

ავტორი: გიორგი ცხაკაია

კვლევის ხელმძღვანელი: მარიამ თოხაძე

რედაქტორები: ქეთევან სართანია, გიორგი გოგუაძე

დოკუმენტის დიზაინი: თამუნა არბოლიშვილი

წინამდებარე კვლევაში გამოხატული მოსაზრებები ეკუთვნის ავტორს და შესაძლოა არ გამოხატავდეს საქართველოს სტრატეგიის და განვითარების ცენტრის პოზიციას. ცენტრის წერილობითი თანხმობის გარეშე დოკუმენტის არცერთი ნაწილი არ შეიძლება გადაიბეჭდოს ნებისმიერი, მათ შორის ელექტრონული ან მექანიკური ფორმით

ტექსტი გამოყენებული შემოკლებები

FATA¹ - ფედერალურად მართული ტომობრივი (ტრაიბალური) რაიონები

Frontier Corps - სასაზღვრო კორპუსი

HUJI – „ჰარაქათ ულ-ჯიჰად ულ-ისლამი“ (ისლამური ჯიჰადის მოძრაობა)

HuM – „ჰარაქათ ულ-მუჯაჰიდინ“ (მუჯაჰიდთა მოძრაობა)

ISI - უწყებათშორისი დაზვერვა (პაკისტანის მთავარი სადაზვერვო სამმართველო)

IShM – „ითეჰად-ე-შურა-ე-მუჯაჰიდინ“ (მუჯაჰიდთა საბჭოს გაერთიანება)

Ji – „ჯამაათ-ე-ისლამი“ (ისლამური ჯამაათი/საზოგადოება)

JUI – „ჯამაათ-ე-ულემა ისლამი“ (მუსლიმ ულემთა (ღვთისმეტყველთა) საზოგადოება)

KPP² - ხაიბერ-პახტუნხვას პროვინცია

LeJ – „ლაშქარ-ე-ჯჰანგვი“

JeM – „ჯაიშ-ე-მუჰამადი“ (მუჰამადის არმია)

LeT – „ლაშქარ-ე-ტაიბა“

TNSM – „თეჰრიქ-ე-ნიფაზ-ე-შარიათ-ე-მოჰამადი“ (მუჰამადის შარიათის განხორციელების მოძრაობა)

TTP (ტექსტი: თთპ) – „თეჰრიქ-ე-ტალიბან-პაკისტან“ (პაკისტანის თალიბანის (სტუდენტთა) მოძრაობა)

¹ შვიდი ოლქისა და ექვსი სასაზღვრო რეგიონისგან შემდგარი ნახევრად-ავტონომიური ადმინისტრაციული ერთეული, რომელიც 2018 წელს ხიბერ-პახტუნხვას პროვინციას გაუერთიანდა.

² ყოფილი NWFP - ჩრდილო-დასავლეთი სასაზღვრო პროვინცია.

პაკისტანის თალიბანი

„თეჰრიქ-ე-თალიბან პაკისტანი“ (შემდგომში - თთპ) პაკისტანის ერთ-ერთი ყველაზე მსხვილი ტერორისტული ორგანიზაციაა. ის 2007 წელს დაფუძნდა, თუმცა მასში გაერთიანებული ზოგიერთი წევრის ისტორია საბჭოთა კავშირის ავღანეთში ინტერვენციის ეპოქიდან შეიძლება ავითვალოთ. თთპ წარმოადგენს სხვადასხვა ზომისა და სიძლიერის დაჯგუფებათა ნაკრებს, რომელთა გეოგრაფია პაკისტანის თითქმის ყველა პროვინციას წვდება. ორგანიზაციის სახელს უკავშირებენ ბენაზირ ბჰუტოს (პაკისტანის ყოფილი პრემიერ-მინისტრი) მკვლელობასა და მოსწავლე გოგონაზე, მალალა იუსაფზაიზე (შემდგომში ნობელის პრემიის ლაურეატი მშვიდობის დარგში) თავდასხმას.

თთპ-ს ჩამოყალიბება, ფუნქციონირება და გავლენის ზრდა ორი მძლავრი კონგლომერატის ჩრდილქვეშ (ავღანეთის თალიბანი და ალ-კაიდა) მიმდინარეობდა, რამაც მნიშვნელოვანი კვალი დატოვა როგორც ორგანიზაციის იდეოლოგიაზე, ისე მის ტაქტიკასა და სამიზნეებზე. მიუხედავად მსგავსებისა (თუნდაც დასახელებებს შორის), არასწორი იქნება, რომ თთპ ავღანეთის თალიბანის რეგიონულ ფილიალად განვიხილოთ (ის ცენტრალიზებულად იმართება და მითითებებს ქუეთას შურასგან იღებს). ავღანეთის თალიბანისგან განსხვავებით, თთპ უპირატესობას პაკისტანის უსაფრთხოების ძალებთან დაპირისპირებას ანიჭებს. თთპ-ს გაცხადებული მიზნებია: პაკისტანში შარიათის კანონმდებლობის ამოქმედება, ავღანეთში საერთაშორისო კოალიციისთან ბრძოლა და ავღანეთის უსაფრთხოების ძალების წინააღმდეგ „თავდაცვითი ჯიჰადის“ წარმოება. თთპ-ს იდეოლოგია უმეტესობა პაკისტანის სამოქალაქო ხელისუფლების დამხობას და „ისლამური სახალიფოს“ დამყარებას იზრახავს. 2014 წლის შემდეგ, შიდა განხეთქილებებმა და პაკისტანის ხელისუფლების ანტიტერორისტულმა კამპანიამ თთპ-ს საფუძველი მნიშვნელოვნად შეარყია. თთპ-ს სახელგავარდნილი წინამძღოლის, მაულანა ფაზლულას დაღუპვის შემდეგ, ტერორისტული ჯგუფის წინაშე ერთიანობის გამონვევა წამოიჭრა. 2018 წელს თთპ-ს მმართველობის სადავეები კვლავ მეჰსუდის ტომმა აიღო ხელში და ორგანიზაციის სტრუქტურული განახლება მოახერხა.

ნაშრომში განხილულია ორგანიზაციის იდეოლოგიური საფუძვლები, რომლებიც თთპ-ს ერთი მხრივ, საერთაშორისო ჯიჰადის ნაწილად, მეორე მხრივ კი რეგიონზე ორიენტირებულად წარმოაჩენს. იმ მიზეზით, რომ თთპ-ში გაერთიანებული ჯგუფები თვისებრივად განსხვავებულ გარემოებებში (ეთნიკურ, გეოგრაფიულ, პოლიტიკურ) აღმოცენდნენ, ცალ-ცალკე არის მიმოხილული ადგილობრივი განშტოებები. სხვა ტერორისტულ ორგანიზაციებთან ურთიერთობების ისტორია თთპ-ს პოტენციურ მოკავშირეთა და მოწინააღმდეგეთა რუკას ხაზავს. ნაშრომში ყურადღება გამახვილებულია თთპ-ს მიმართ პაკისტანის ხელისუფლების თავისებურ დამოკიდებულებაზე, რაც მის „კარგ“ და „ცუდ“ თალიბანად დაყოფას ნიშნავს.

თთპ, დღეს, კვლავ პაკისტანის ეროვნული უსაფრთხოების უდიდეს გამონვევადაა შეფასებული. 2018 წელს დაჯგუფებამ ქვეყნის ტერიტორიაზე 79 ტერორისტული აქტი განახორციელა (მათ შორის, 57 KPP-სა და FATA-ში, 18 ბელუჯისტანში, 2-2 კი პენჯაბსა და კარაჩიში), რომელთა შედეგადაც 185 ადამიანი დაიღუპა და 3336 დაშავდა.³

³ შედარებისთვის, 2017 წელს დაჯგუფების „ანგარიშზე“ 70 ტერორისტული აქტი და 186 მოკლული იყო. იხ. *Pakistan Security Report. Conflict and Peace Studies Vol. 11*, Islamabad: Pak Institute for Peace Studies, 2019, გვ. 74-75

ეს ცხადყოფს, რომ ორგანიზაციის ოპერაციული შესაძლებლობები კვლავ უვნებელია (განსაკუთრებით, KPP-ს ფარგლებში). თთპ-ს მთავარ დამაბრკოლებლად მიიჩნევა არა იმდენად პაკისტანის ხელისუფლების ანტიტერორისტული პოლიტიკა, არამედ შიდა დაპირისპირებები, ფინანსების მართვის დისფუნქცია და სხვა ტერორისტულ ჯგუფებთან კონკურენცია.

ორგანიზაციის დაფუძნება

2007 წლის 14 დეკემბერს პაკისტანის რუკაზე ტერორიზმის კიდევ ერთი, ამჯერად, მსხვილი ლაქა გამოჩნდა. განსხვავებული სიძლიერის, ბიოგრაფიისა და ინტერესების მქონე ჯგუფებმა ერთი ქოლგის ქვეშ მოიყარა თავი და ის „**თეჰრიქ-ე-თალიბან პაკისტანის**“ სახელს ატარებს. ახლადშექმნილი დაჯგუფების გეოგრაფია მოიცავდა FATA-ს შვიდივე ოლქს (ე. წ. პაკისტანის უსაფრთხოების ვაკუუმი“), ასევე, პაკისტანის მთავრობის მიერ დე-ფაქტოდ მართულ ხაიბერ-პახტუნხვას პროვინციის ნაწილებს. ორგანიზაციის მეთაურად ორმოცნევერიანმა შურამ (წარმომადგენლობითი და საკონსულტაციო საბჭო) **ბაითულა მეჰსუდი**⁴ აირჩია მეჰსუდთა კლანიდან (სამხრეთ ვაზირისტანი). მეჰსუდის მოადგილეებად მაულანა⁵ ჰაფიზ გულ **ბაჰადური** (ჩრდილო ვაზირისტანი) და მაულანა **ფაკირ მოჰამადი** (ბაჰაურის ოლქიდან) დასახელდნენ. კიდევ ერთი, გენერალური მდივნის, მეტწილად, სიმბოლური პოზიცია მაულანა **ფაზლულამ** (სვატის რაიონი, ხაიბერ პახტუნხვას პროვინცია) დაიკავა. ჯამში, ბაითულა მეჰსუდს (არ. „ბაიათი“) ოცდაშვიდმა დაჯგუფებამ შეჰფიცა⁶ ერთგულება, რამაც თთპ-ს მოქმედების მასშტაბი მნიშვნელოვნად გააფართოვა.

თთპ-ს დამფუძნებლებმა თავიანთი ხედვა და მოთხოვნები შემდეგნაირად გააუღერეს⁷:

❖ ისლამური კანონმდებლობის / შარიათის აღსრულება;

შარიათის საჯარო კანონმდებლობის რანგში აყვანას პაკისტანში მოქმედი თითქმის ყველა დიდი თუ მცირე ტერორისტული დაჯგუფება მოითხოვს (რიტორიკის დონეზე მაინც). თთპ პაკისტანის ხელისუფლებას და მის ქვემდებარე სტრუქტურებს (არმია, დაზვერვა, სამართალდამცავი ორგანოები) „ურწმუნოებად“ და „განდგომილებად“⁸ მიიჩნევს. მიუხედავად ამისა, საყურადღებოა, რომ პაკისტანის კონსტიტუცია, ზოგიერთი მკვლევრის მიერ⁹, შარიათთან ერთ-ერთ ყველაზე „თავსებად“ დოკუმენტად მიიჩნევა, რომელშიც მკაფიოდაა ხაზგასმული ყურანისა და სუნას როლი სახელმწიფოს პოლიტიკის განსაზღვრაში (227-ე მუხლი).

⁴ Abbas, Hassan. *A Profile of Tehrik-I-Taliban Pakistan*, CTC Sentinel 1 (2), West Point: NY, January 2008.

⁵ ცენტრალური და სამხრეთი აზიის მუსლიმურ თემებში „მაულანა“, „მაულვი“, „მოლა“ ფორმალური განათლების (ძირითადად მადრასიდან/ „დარ ულ-ულუმიდან“) სასულიერო პირების/სწავლულების წოდებად იყენებენ.

⁶ Ibid.

⁷ Abbas, Hassan. *The Taliban Revival - Violence and Extremism on the Pakistan-Afghanistan Frontier*, Yale University Press, New Haven, 2014, გვ. 151-153

⁸ Sheikh, Mona K. *Sacred Pillars of Violence: Findings from a Study of the Pakistani Taliban*, Politics, Religion & Ideology, 13:4, გვ. 444-445

⁹ Zoli, Corri. & Schneider, Emily. *How Islamic is Pakistan's Constitution?*, Foreign Policy, May 2014 <http://bit.ly/358p4vu>

❖ **ნატო-ს ძალების წინააღმდეგ ავღანეთში ერთიანი ფრონტი ბრძოლა;**

თთპ-ს დამფუძნებელთა საგრძნობმა ნაწილმა ჯიჰადის გამოცდილება ავღანეთში თალიბანის „ხელისუფლების“ დამხობის შემდეგ საერთაშორისო კოალიციის/ISAF ძალებთან ბრძოლაში მიიღო (ხოლო უფროსმა თაობამ - სსრკ-ს ინტერვენციის პერიოდში). გარდა ამისა, მნიშვნელოვან როლს ასრულებს ე. წ. „დიურანდის ხაზის“ გასწვრივ მცხოვრებ პუშტუნთა¹⁰ ურთიერთკავშირები.

❖ **პაკისტანის ხელისუფლების წინააღმდეგ „თავდაცვით ჯიჰადში“ ჩაბმა;**

ეს პუნქტი თთპ-სა და სხვა დაჯგუფებებს შორის „განხეთქილების ვაშლად“ მრავალჯერ ეცეულა. ავღანეთის თალიბანი (ქუეთას შურა), „ჰაკანის ქსელი“, ისევე როგორც თთპ-ში შემავალი ზოგიერთი გაერთიანება თავს არიდებენ პაკისტანის ხელისუფლებასთან ღია დაპირისპირებას. თავის მხრივ, უწყებათშორისი დაზვერვის სამსახური თალიბანის ანტი-პაკისტანურ და ანტი-ავღანურ ფრთას¹¹ შორის უთანხმოების დათესვას ცდილობს. თთპ-ს ანტი-პაკისტანურ პოზიციას ალ-კაიდას ლიდერები იზიარებენ (ზოგიერთი სხვა არაპუშტუნური დაჯგუფებაც). შეიძლება ითქვას, რომ ეს საკითხი თთპ-ს ეკლექტურ წევრებს შორის წყალგამყოფ მსაზღვრელად ჩამოყალიბდა.

❖ **FATA-ს ტერიტორიაზე საკონტროლო-გამშვები პუნქტების გაუქმება და სვატისა და ჩრდილო ვაზირისტანის ოლქებში სამხედრო ოპერაციების დასრულება;**

ზოგადად, FATA-ს ტერიტორიაზე (რომელიც ბოლო დრომდე ნახევრად-ავტონომიურ ანკლავს წარმოადგენდა) ცენტრალური ხელისუფლების მიერ ნებისმიერ ჩარევას ადგილობრივი ტომები და ისლამისტური ჯგუფები მწვავედ აღიქვამენ. პუშტუნთათვის საკვანძო მნიშვნელობის უფლება - დაუბრკოლებლად გადაადგილდნენ როგორც FATA-ს, ისე საზღვრისმილმა რაიონებში - ჩატარებული სამხედრო კამპანიების შედეგად „შეიზღუდა“. თავად თთპ-ს მიუღებლად მიაჩნია „ურწმუნოებად“ გამოცხადებული პაკისტანის არმიის ნაწილების „საკუთარ“ საზღვრებში განლაგება.

❖ **პაკისტანის ხელისუფლებასთან (ნებისმიერი სახის) სამშვიდობო მოლაპარაკებაზე უარის თქმა;**

თთპ-ს (უფრო ადრე კი - მის დამფუძნებელ ჯგუფებს) მთავრობასთან მოლაპარაკების ხანგრძლივი ისტორია გააჩნია¹². ცეცხლის შეწყვეტა და დროებითი დაზავება ორგანიზაციას ხელს უხსნიდა სტრატეგიული გადაჯგუფებისა და რეგენერაციისთვის. თუმცა, თთპ-ს მანიფესტის თანახმად, ორგანიზაციის ძალისხმევა პაკისტანის (სეკულარული) ხელისუფლების დამხობისკენ არის მიმართული, და არა მასთან მორიგებისკენ.

¹⁰ 2430 კმ სიგრძის სახმელეთო საზღვარი დღევანდელ ავღანეთსა და პაკისტანს შორის, რომელიც მეორე ანგლო-ავღანური ომის შემდეგ ბრიტანელმა დიპლომატმა მორტიმერ დიურანდმა ძირითადად პუშტუნებით დასახლებულ ტერიტორიებზე გაავლო.

¹¹ Khattak, Daud. *The Complicated Relationship Between the Afghan and Pakistani Taliban*, CTC Sentinel, Volume 5, Issue 2, West Point: NY, February 2012

¹² Fayyaz, Shabana. *Towards a Durable Peace in Waziristan*, Pakistan Security Research Unit, Brief 10, April 2007

- ❖ „ლალ მასჯიდის“ (წითელი მეჩეთი) იმამის, აბდულ აზიზის პატიმრობიდან გათავისუფლება¹³.

ქვეყნის დედაქალაქში მდებარე „ლალ მასჯიდი“ (წითელი მეჩეთი) მრავალი წლის განმავლობაში რადიკალური ისლამის მიმდევართა თავშეყრის ადგილი იყო. 2007 წლის თებერვალში მეჩეთთან არსებული სემინარიის (გოგონათა - „ჯამია ჰაფსა“, ხოლო ვაჟთა - „ჯამია ფარიდია“) სტუდენტებმა ისლამაბადის საჯარო ბიბლიოთეკა დაიკავეს და შარიათის სახელმწიფოს მასშტაბით დაკანონება მოითხოვეს. მათი ნაწილი სილამაზის სალონებს დაესხა თავს და პროტესტის ნიშნად მუსიკალური კასეტები გაანადგურეს. სტუდენტების ჯგუფს იდეოლოგიურად ზურგს უმაგრებდა „ლალ მასჯიდის“ ორი სასულიერო პირი, აბდულ აზიზი და აბდულ ლაზი რაშიდი შარიათი (ძმები). მოგვიანებით, მათ მძევლად აიყვანეს პოლიციელები და სილამაზის სალონის თანამშრომლები, რამაც სახელმწიფოს სამხედრო ჩარევისკენ უბიძგა („ოპერაცია დემილი“). სპეცოპერაციის დროს რაშიდი დაიღუპა, ხოლო აბდულ აზიზი დააკავეს. „ლალ მასჯიდის“ საქმეს პაკისტანის ისლამისტურ წრეებში მწვავე გამოხმაურება და ტერორისტული აქტების წყება მოჰყვა.

პაკისტანის თალიბანის იდეოლოგია

პაკისტანის თალიბანი არაერთგვაროვან, მყიფე და დეცენტრალიზებულ გაერთიანებას წარმოადგენს. ორგანიზაციის იდეოლოგიური ხერხემალი შედგება რამდენიმე საზიარო პოსტულატისგან, რომლებიც, თავისთავად, თთპ-ს პოლიტიკაზე სხვადასხვა სიძლიერით აისახება. თთპ-ს მრწამსი, ერთი მხრივ, დეობანდისტური¹⁴ მადრასებიდან, მეორე მხრივ, ავღანური ჯიჰადის გავლით შემოსული სალაფიზმიდან¹⁵ იკვებება. დეობანდისტური ისლამი ინდოსტანის ნახევარკუნძულზე გავრცელებული მრავალი ისლამისტური ჯგუფის იდეოლოგიურ ბირთვს შეადგენს, თუმცა, თთპ-ს შემთხვევაში, სალაფისტური გავლენა მის მკვეთრად სექტარიანულ პროფილში აისახა. მკვლევრები თანხმდებიან¹⁶, რომ პრაქტიკული გადაწყვეტილების მიღებისას თთპ ნაკლებად მისდევს რომელიმე კონკრეტული მიმდინარეობის სწავლებას. საკუთარ ადეპტებს ის ბუნდოვან, არათანმიმდევრულ ხედვებს სთავაზობს, რომლებიც ხშირად სცდება ისლამის დამკვიდრებულ, ორთოდოქსულ გაგებას.

„თალიბანიზაცია“ მმართველობის პარალელური სისტემის ჩამოყალიბებას გულისხმობს, რაც საჯარო (სეკულარული) ხელისუფლებისგან ავტონომიურ

¹³ Behuria, Ashok K. *The Rise of Pakistani Taliban and the Response of the State*, Strategic Analysis, 31:5, December 2007, გვ 712-713

¹⁴ დეობანდიზმი: ისლამის მიმდინარეობა, რომელიც ინდოეთის ქალაქ დეობანდში ჩაისახა („დარ-ულ-ულუმ დეობანდი“). დეობანდიზმის მიმდევარი ღვთისმეტყველები (ულემები) დასავლური კულტურის (ვესტერნიზაციის), ბრიტანული კოლონიალიზმის გამოირჩეოდნენ კრიტიკით და მორწმუნეებს წინააღმდეგობის განწვევისკენ მოუწოდებდნენ.

¹⁵ აჰლ-ე-ჰადისი: (არ. ჰადისების ხალხი) სალაფიზმის პაკისტანური მიმდინარეობა, რომელიც არაბეთის ნახევარკუნძულზე გავრცელებული ვაჰაბიზმის პურიტანული მიდრეკილებებითაა ნასაზრდოები. სალაფიზმი ისლამური საზოგადოების პირველი ხანის (მოციქულ მუჰამადის ეპოქა) იდეალებისკენ შემობრუნებას ქადაგებს, რაც რწმენისა და მისი პრაქტიკის განახლებას ან იოტისოდენ ცვლილებასაც კი გამორიცხავს. დეობანდისტები განსხვავებით, აჰლ-ე-ჰადისის მიმდევრები უარყოფენ „თაკლიდს“ (ფიკჰის/სამართლის საკითხებში რელიგიური ავტორიტეტის მოსაზრების, როგორც სამართლის წყაროს, აღიარება).

¹⁶ Feyyaz, Muhammad. *Religion, Ethnicity, Social Organizations and Terrorists' Behavior - a Case of Taliban Movement in Pakistan*, Journal of Behavioural Sciences of Terrorism and Political Aggression, 2015, გვ. 15-17

სასამართლოს, სამართალდამცავ და სხვა აღმასრულებელ ძალაუფლებას თოპ-ს ხელში მოუყრის თავს. ეს ნაწილობრივ განხორციელდა სამხრეთ ვაზირისტანის (ბაითულა მეჰსუდი), ჩრდილოეთ ვაზირისტანის (ჰაფიზ გულ ბაჰადური) და სვატის ოლქის (მაულანა ფაზლულა) შემთხვევაში, თუმცა, ყოვლისმომცველ „თალიბანიზაციას“, ადგილობრივი ტომობრივ-კლანური წინააღმდეგობისა და პაკისტანის არმიის სამხედრო ოპერაციების შედეგად, ხორცი არ შესხმია.

წლების განმავლობაში თოპ შარიათის მკაცრ ინტერპრეტაციას FATA-სა და KPP-ს ტერიტორიაზე აგრესიულად ნერგავდა. ამ მხრივ, სახელმძღვანელო აღმოჩნდა ავღანეთის თალიბანის მმართველობის დროინდელი გამოცდილება. განსაკუთრებული ავტორიტეტით სარგებლობდა 1996 წელს, ქაბულში, თალიბანის ქვემდებარე სტრუქტურის (ე. წ. „სათნობათა ხელშეწყობისა და მანკიერებათა აღმოფხვრის დეპარტამენტი“) მიერ გავრცელებული ქცევის კოდექსი¹⁷, რომელიც შემდეგ დებულებებს შეიცავდა:

- ❖ ქალებისთვის ჰიჯაბის სავალდებულო ტარება;
- ❖ ყველა სახის მუსიკის, ცეკვის, დაკვრის აკრძალვა საჯარო სივრცეში;
- ❖ აზარტული თამაშების, მევახშეობის („რიბა“) აკრძალვა;
- ❖ მამაკაცთათვის წვერის ტარება და ლოცვის („სალათი“) სავალდებულო შესრულება.

კარი ჰუსაინის (ბაითულა მეჰსუდის მოადგილე) მიერ გამოცემული ფათვა¹⁸ თოპ-ს წევრებს ნებას რთავს, რომ თავს დაესხან ბანკებს (როგორც არაისლამურ დაწესებულებას) და გაძარცვონ რელიგიური უმცირესობები. ავღანეთის თალიბანის მსგავსად, თოპ საჯაროდ წვავს საყოფაცხოვრებო ტექნიკას (ტელევიზორები, აუდიო და ვიდეო ჩანაწერები), ზღუდავს ქალთა უფლებებს (დასაქმების, განათლების, საჯარო ადგილებში გამოჩენის), აწესებს ჩაცმულობის („პურდა“) იძულებით სტანდარტს (შალვარ-კამიზი მამაკაცებისთვის, ბურკა ქალებისთვის). თოპ-ს იდეოლოგია, პაკისტანში მოქმედი სხვა ისლამისტური ჯგუფების მსგავსად, გამოკვეთილად ანტიდასავლური (უფრო კონკრეტულად, ანტიამერიკული) და ანტისეკულარულია. გარდა კულტურული მიუღებლობისა, რაც საზოგადოებრივი ნორმების დასავლური მოდელის „აღვირაბსნილად“ და „უმეცრობად“ (ჯაჰილი) გამოცხადებას გულისხმობს¹⁹, თოპ-ს მეთაურები ხაზს უსვამენ „დასავლეთის აგრესიულ, ინტერვენციულ პოლიტიკას“. ე. წ. „გაუთვალისწინებელ სამოქალაქო მსხვერპლს“, რომელიც თან ახლავს საჰაერო დარტყმებსა თუ საარტილერიო იერიშებს, რასაც თოპ-ს მიმდევრები მუსლიმთა წინააღმდეგ განზრახულ ბოროტებად აღიქვამენ. ამით ისინი ჯიჰადის საერთაშორისო ხასიათს²⁰ (რომელსაც, ძირითადად ალ-კაიდა ლობირებს) აღიარებენ, თუმცა უპირატეს მტრად დასავლეთის ადგილობრივ „ხელქვეითს“, პაკისტანის ხელისუფლება მიიჩნევენ²¹. იგივე „განაჩენი“ ვრცელდება პაკისტანში მოქმედ საერთაშორისო სამთავრობო თუ არასამთავრობო ორგანიზაციებზე²².

¹⁷ Behuria, Ashok K. *The Rise of Pakistani Taliban and the Response of the State*, Journal of Strategic Analysis, 31:5, December 2007, გვ. 705-706

¹⁸ Feyyaz, Muhammad. გვ. 8

¹⁹ Valentine, Simon R. *The Tehrik-i-Taliban Pakistan: Ideology and Beliefs*, Pakistan Security Research Unit, Brief 49, September 2009, გვ. 7

²⁰ Ibid.

²¹ Ibid. პაკისტანის ყოფილი პრეზიდენტები მუშარაფი და ალი ზარდარი, რომლებსაც აშშ-ს „ბინძური პოლიტიკის“ გამტარებელ „ფინიებად“ და „ლაქიებად“ მოიხსენიებდნენ.

²² თავდასხმა გაეროს სურსათის პროგრამის ოფისზე ისლამაბადში 2009 წლის ოქტომბერში, რომელიც, თოპ-ს სპიკერის თანახმად „გაეროს, როგორც აშშ-ს ინტერესების გამტარის წინააღმდეგ იყო მიმართული“. (იხ. <https://nyti.ms/31UzJaZ>)

ქაშმირის კონფლიქტი „პაკისტანის თალიბანისთვის“ პრიორიტეტულ საკითხს არ წარმოადგენს. მოლა ნაზირის განცხადებით - „ქაშმირის ჭიჭადს ჩვენი მიზნების მიღწევაში არანაირი წვლილი არ შეაქვს“²³. ამგვარი უგულებელყოფა თავად „ქაშმირის ჭიჭადის“ თავისებურებით შეიძლება აიხსნას. ცნობილია, რომ კონფლიქტში მონაწილე ისლამისტური ჯგუფები (განს. LeJ, JeM და სხვ.) სხვადასხვა დროს, ხელისუფლების (პაკისტანური) მხარდამჭერი (ან სულაც მიუმხრობელი) განწყობით გამოირჩევიან, რაც თთპ-ს თვალში მათ ჭიჭადისტურ მოტივებს აკნინებს. თთპ ენერგიულად უარყოფს საკუთარი პოლიტიკური ხედვის სეკულარულ, ნაციონალისტურ, მემარცხენე და სხვა ალტერნატივებს²⁴, რომლებიც დემოკრატიასთან (შესაბამისად კი, „შირქთან“/წარმართობა) ასოცირდება.

ძალადობის „გამართლებას“ თთპ-ს იდეოლოგიები რელიგიური არგუმენტის მოშველიებით ცდილობენ. „თაქფირის“²⁵ დოქტრინა მათ ხელს უხსნის პაკისტანის ხელისუფლებისა და (თთპ-ს მიმართ) მტრულად განწყობილი სამოქალაქო მოსახლეობის მიზანში ამოსაღებად. აბდულა აზამის²⁶ პრინციპი („მხოლოდ ჭიჭადი და ავტომატი: არავითარი მოლაპარაკება, თათბირი და დიალოგი“) თთპ-ს მეთაურთა ხედვაში აირეკლა²⁷. მნიშვნელოვანი ცნებაა „თავდაცვითი ჭიჭადი“, რომელიც თთპ-ს მიმდევრებს პაკისტანის არმიის (როგორც აშშ-ს მოქირავნეები) წინააღმდეგ იარაღის ასხმას ავალდებულებს.

როგორ აღინიშნა, თთპ-ს სექტარიანული მიდრეკილება მეტწილად სალაფისტურ ელემენტებთან (ალ-კაიდა, LeJ) ურთიერთობით ჩამოყალიბდა. პაკისტანში მცხოვრებმა ეგვიპტელმა სასულიერო პირმა, აბუ ამრმა მნიშვნელოვანი როლი ითამაშა ბაითულა მეჰსუდის მსოფლმხედველობის ჩამოყალიბებაში. თავის ნაშრომში²⁸ („უკეთესია თუ არა ჭიჭადის წარმოება ურწმუნოთა ქვეყანაში, თუ ურწმუნოების მიერ დამონებულ ისლამურ ქვეყანაში“) იგი ამტკიცებს, რომ ყურანისა და სუნას თანახმად, „ის, ვინც ურწმუნოს ნებისმიერი სახის დახმარებას გაუწევს, თავადაც ურწმუნოა“. შესაბამისად, მიუხედავად მათი რელიგიისა (ისლამი), მართებულია პაკისტანის არმიასა და უსაფრთხოების ძალებზე თავდასხმა. აბუ ამრი მიიჩნევს, რომ შიიტები, როგორც „უარყოფელები (რაუაფიდ), როგორც ისლამის უკანონო შვილები, უნდა განადგურდნენ“. სექტარიანიზმმა ფეხი განსაკუთრებით შიიტური უმცირესობებით დასახლებულ რაიონებში (ქურამი, ორაქზაი)²⁹ მოიკიდა. გარკვეული წვლილი თემთაშორის დაპირისპირებაში თავად შიიტების რადიკალიზებამაც შეიტანა (1979 წლის ირანის ისლამური რევოლუციის შედეგად). FATA-ში პაკისტანის ექსტრემისტული დაჯგუფებების (SSP, LeJ, JeM) გამოჩენამაც ვითარება კიდევ უფრო გაამწვავა.

²³ Siddique, Qandeel. *Tehrik-E-Taliban Pakistan - An Attempt to Deconstruct the Umbrella Organization and the Reasons For Its Growth In Pakistan's North-West*, Danish Institute for International Studies, 2010:12, 24

²⁴ პაკისტანის სახალხო პარტია (PPP), ავამის ეროვნული პარტია (ANP), გაერთიანებული ეროვნული მოძრაობა (MQM).

²⁵ მუსლიმის თემიდან (არ. უმა) განკვეთა პირის „ქაფირად“ (ურწმუნო) გამოცხადების გზით, რაც მას ჭიჭადის ობიექტად აქცევს. აღნიშნულ პრაქტიკის დასაბუთებას იბნ თაიმიასთან, ალ-მაუდუდისთან, საიდ კუტბთან და სხვა მუსლიმ სწავლულებთან ვაწყდებით.

²⁶ აბდულა აზამი: ალ-კაიდას ერთ-ერთი დამფუძნებელი და უსამა ბინ ლადინის მენტორი.

²⁷ „მხოლოდ ჭიჭადი დაამყარებს მშვიდობას მსოფლიოში“ (ბაითულა მეჰსუდი); „ჩვენი ჭიჭადი პაკისტანით ან ავღანეთით არ იფარგლება. ის გლობალური ჭიჭადია, რომელიც მსოფლიოში შარიათის დამყარებას ესწრაფის“ (მოლა ნაზირი).

²⁸ Marquardt, Erich & Bakier, Abdul H. *An Ideological and Operational Threat: Abu 'Amr/Shaykh 'Isa*, CTC Sentinel 1(8), West Point: New York, July 2008

²⁹ Zahab, Mariam A. *Unholy Nexus: Talibanism and Sectarianism in Pakistan's "Tribal Areas"*, Sciences Po - Ceri, June 2009 published online at <http://bit.ly/2APsG7Q>

თოპ სამხრეთ ვაზირისტანში

ექვგარეშეა, რომ თოპ-ს პირველსაწყისები FATA-ს უკიდურეს სამხრეთში მდებარე სამხრეთ ვაზირისტანის პროვინციაში უნდა ვეძებოთ. სამხრეთ ვაზირისტანი, როგორც FATA-ს სხვა პროვინციები, პაკისტანის ცენტრალურ ხელისუფლებას მხოლოდ ფორმალურად თუ ექვემდებარებოდა. 1978 წელს ავღანეთში გაჩაღებულმა სამოქალაქო ომმა ვაზირისტანელი პუშტუნებიც აღძრა მუჯაჰიდების დასახმარებლად. ანტი-საბჭოთა ჯიჰადის პერიოდში FATA-ს ტერიტორიაზე არაერთი მადრასა და საწვრთნელი ბაზა გაიხსნა, სადაც მეჭუსუდისა და ვაზირის ტომის (პროვინციის ავტოქთონი ორი მთავარი ტომი) მრავალი წევრის ინდოქტრინაცია ხდებოდა. 1989 წელს, საბჭოთა ჯარების ავღანეთიდან გაყვანის შემდეგ, ბრძოლაში გამონრთობილი ვაზირისტანელები შინ დაბრუნდნენ. მათი ნაწილი ქაშმირის ჯიჰადს შეუერთდა, ხოლო ნაწილმა კვლავ ავღანეთში დაბრუნება და ახლადშობილი თალიბანის რიგების შევსება გადაწყვიტა (რომელიც 1996 წელს ავღანეთის ხელისუფლებაში მოვიდა). 1996-2001 წლებში ავღანური ჯიჰადის თალიბი ვეტერანები პროვინციის თანდათანობითი ინფილტრაციას შეუდგნენ. მდგომარეობა მკვეთრად შეიცვალა 2001 წელს აშშ-სა და ნატო-ს ძალების ავღანეთში ინტერვენციის შედეგად, როდესაც ალ-კაიდა და მასთან დაკავშირებულმა დაჯგუფებებმა (ძირითადად უზბეკურმა, ჩეჩნურმა, ტაჯიკურმა) თავშესაფარი სამხრეთ ვაზირისტანში ჰპოვეს. ვაზირისტანელმა მებრძოლებმა (აბდულა მეჭუსუდი, ბაითულა მეჭუსუდი, ნეჟ მუჰამადი, ჰაჯი შარიფი, ჰაჯი ომარი)³⁰ თალიბანის ადგილობრივი უჯრედების ფორმირება ითავეს.

ნეჟ მუჰამადი (აჰმადზაის ვაზირთა ტომი), რომელიც ავღანურ ჯიჰადს 1993 წელს შეუერთდა³¹, ქაბულიდან ვანაში (პროვინციის დედაქალაქი) თალიბების დამხობის გამო დაბრუნდა. თანატომელებისგან შემდგარი რაზმით მან საერთაშორისო კოალიციის ძალებზე თავდასხმა დაიწყო. მანვე შეიფარა ალ-კაიდას არაბი მებრძოლები, ისევე როგორც უზბეკეთის ისლამური მოძრაობის (IMU) მეთაური ტაჰირ იულდაშევი. 2004 წელს, აშშ-ს მთავრობის ზეწოლით, პაკისტანის არმიამ ვანაში მასობრივი სამხედრო ოპერაცია ჩაატარა. რამდენიმეკვირიანი ინტენსიური ბრძოლის შემდეგ პაკისტანის მთავრობამ ნეჟ მუჰამადის ძალებთან ხელი მოაწერა ე.წ. „შაქაის შეთანხმებას“³². ხელისუფლებამ თალიბანის ადგილობრივ ჯგუფს ალ-კაიდასთან ფინანსური ვალდებულებების გასასტუმრებლად სახსრები გამოუყო, ხოლო ნეჟ მუჰამადი თანამებრძოლთა განიარაღებას და პროვინციის ტერიტორიაზე მაცხოვრებელ უცხოელ მებრძოლთა „დარეგისტრირებას“ (აღრიცხვაზე აყვანას) დათანხმდა. ნეჟ მუჰამადი შეთანხმებიდან ცოტა ხნის შემდეგ უპილოტო საფრენ აპარატს ემსხვერპლა³³.

³⁰ Siddique, Qandeel. *Tehrik-E-Taliban Pakistan - An Attempt to Deconstruct the Umbrella Organization and the Reasons For Its Growth In Pakistan's North-West*. Danish Institute for International Studies, 2010:12, გვ 30-33

³¹ Bergen, Peter & Tiedemann, Katherine (eds). *Talibanistan: Negotiating the Borders between Terror*. Politics and Religion, Oxford University Press, New York, 2013, გვ. 167-168

³² Ahmed, Khaled. *Sleepwalking to Surrender: Dealing with Terrorism in Pakistan*. Penguin Haryana: Random House India, 2016, გვ. 48

³³ Hussain, Syed T. *Pak Army kills pro-Taliban tribal leader, but Musharraf's worries remain*. India Today, July 2004 <http://bit.ly/2p1m59>

ქარიზმატული მეთაურის სიკვდილს ყოფილ თანამებრძოლებს შორის დაპირისპირება მოჰყვა. ჰაჯი ომარი (ვანას თალიბანი) უზბეკთა და სხვა უცხოური დაჯგუფებების FATA-ში ყოფნას მიესალმებოდა, მაშინ როცა მოლა ნაზირი³⁴ მათ დაუყოვნებლივ გაძევებას მოითხოვდა. საბოლოოდ ჰაჯი ომარსა და ჰაჯი შარიფს სამხრეთ ვაზირისტანიდან ჩრდილოეთ ვაზირისტანში თავის შეფარება მოუწიათ³⁵. უზბეკებმა მექსუდებით დასახლებული ტერიტორიებისკენ გადაინაცვლეს, სადაც ისინი აბდულა და ბაითულა მექსუდებმა მიიღეს.

2007 წლის დეკემბერში თთპ-ში ყველა დიდი ვაზირისტანული დაჯგუფება გაერთიანდა. ორგანიზაციამ პროვინციაში აბსოლუტური აღმასრულებელი ძალაუფლება გაავრცელა (გადასახადების აკრეფიდან სამართალწარმოებამდე). თთპ-ს პირველი ლიდერი, ბაითულა მექსუდი³⁶ (მექსუდთა შობი ხელის გვარი) საკუთარი ავტორიტეტით დაპირისპირებული ფრაქციების მორიგებას ახერხებდა. 2009 წელს ბაითულას სიკვდილმა მის პოტენციურ მემკვიდრეებს (ჰაქიმულა მექსუდი, კარი ჰუსაინი, ვალი ურ-რეჰმან მექსუდი, აზმათულა მექსუდი) შორის დავა გამოიწვია. სირაჯუდინ ჰაკანის (ჰაკანის ქსელის ლიდერი) შუამავლობამ თთპ-ს შეიარაღებული შეხლა-შემოხლა თავიდან ააცილა. საბოლოოდ, FATA-ს სხვა პროვინციებიდან (ხიბერი, ბაჯაური, ქურამი, ორაქბაი) მიღებული მხარდაჭერით ჰაქიმულა მექსუდმა ორგანიზაციის შურაში საკუთარი კანდიდატურის გაყვანას მიაღწია³⁷.

2009 წლის ოქტომბერში პაკისტანის არმიამ ვაზირისტანის ტერორისტულ კერაზე ახალი იერიშის მიტანა სცადა (ოპერაცია „რაჰ-ე-ნიჯათი“/“გზა ხსნისკენ“). არმიისთვის კრიტიკულად მნიშვნელოვანი აღმოჩნდა თთპ-ს მოცილე ჯგუფების (აბდულა მექსუდის დაჯგუფება, თურქისტან ბჰიტანის დაჯგუფება)³⁸ გადმობირება ჰაქიმულა მექსუდთან ერთიანი ფრონტით დასაპირისპირებლად. მექსუდის ტომის ბელადებმა ადგილობრივი სახალხო „ლაშქრები“ შეკრიბეს, რომლებსაც ზურგს მთავრობის ფინანსური სახსრები უმაგრებდათ. სამხრეთ ვაზირისტანის სამთვიანმა ბლოკადამ, პაკისტანის საჰაერო ძალების მიერ თთპ-ს დასაყრდენი რაიონების ინტენსიურმა დაბომბვამ და მასშტაბურმა მსხვერპლმა ორგანიზაციის მეთაურები აიძულა, ჩრდილოეთ ვაზირისტანში გახიზნულიყვნენ.

³⁴ მაულვი ნაზირი (1975-2013) : თთპ-ს ლიდერი სამხრეთ ვაზირისტანში (აჰმადზაის ტომიდან), გამოირჩეოდა პრო-პაკისტანური პოზიციებით (ე. წ. "კარგი თალიბანი"). დამატებით იხ. Rehman, Zia U. *The Significance of Maulvi Nazir's Death in Pakistan*. West Point: CTC, January 2013

³⁵ Nasir, Sohail A. *South Waziristan's Veteran Jihadi Leader: a Profile of Haji Omar*. Terrorism Focus 3 (31), Jamestown Foundation, August 2006 <http://bit.ly/31YSo5w>

³⁶ Walsh, Declan. *Profile: Baitullah Mehsud*. The Guardian, August 2009 <http://bit.ly/337MvDk>

³⁷ Khan, Mukhtar A. *A Profile of the TTP's New Leader: Hakimullah Mehsud*. West Point: CTC, Volume 2 (10), October 2009

³⁸ Bergen, Peter & Tiedemann, Katherine (eds). გვ. 171-173

თთპ ჩრდილო ვაზირისტანში

ათწლეულების განმავლობაში ჩრდილო ვაზირისტანი როგორც საერთაშორისო, ისე ადგილობრივი ტერორიზმისთვის საიმედო პლაცდარმს წარმოადგენდა. ამას ხელს მთიანი რელიეფი და გეოგრაფიული იზოლაცია უწყობდა. მას შემდეგ, რაც სახელგავარდნილმა ჯალალუდინ ჰაკანიმ³⁹ (ხოსტის პროვინცია, ავღ.) მირამ შაჰში (ჩრდ. ვაზირისტანის დედაქალაქი) დაფუძნება გადაწყვიტა, FATA-ს სიდიდით მეორე პროვინცია მუჯაჰიდების ერთ-ერთ მთავარ თავშესაფრად იქცა⁴⁰. ჰაკანების გარდა (რომელთაც უკვე ჯალალუდინის შვილი, სირაჯუდინი მეთაურობს), ფართო გავლენით სარგებლობს ჰაფიზ გულ ბაჰადური (უსმანზაის ვაზირთა ტომის მადა ხელის კლანიდან). ჰაკანების შესადარი სამხედრო გამოცდილების უქონლობის მიუხედავად, ბაჰადურმა ძალაუფლების დასაყრდენი ტომობრივ კავშირებში იპოვა. სადიკ ნური, ბაჰადურის მონაცვლე და თანაშემწე, დაურისა და ვაზირის ტომელთა ადგილობრივ კოალიციას მეთაურობდა.

ჰაფიზ გულ ბაჰადური ფაკირ იპის, ბრიტანული ოკუპაციის წინააღმდეგ სახელგანთქმული მებრძოლის შთამომავალია. მან განათლება მულტანის (პანჯაბშია) დეობანდისტურ მადრასაში მიიღო, რის შემდეგაც ისლამისტური პარტიაში („ჰამიათ ულემა-ე-ისლამ“) გაერთიანდა. ბაჰადურმა გავლენა 2004 წელს, ვაზირისტანში ჩატარებული სამხედრო ოპერაციის შედეგად მოიხვეჭა. იგი სხვა ჯგუფებთან ურთიერთობისას პრაგმატულობით გახდა ცნობილი. ერთი მხრივ, ბაჰადური ბაითულა მეჰსუდთან ერთად ხელისუფლებას დაუპირისპირდა და პაკისტანურ ჯიჰადში ჩაება⁴¹. თუმცა, ჩრდილო ვაზირისტანის თთპ-ს მთავარ ამოცანას აშშ-სა და ნატო-ს ჯარებთან ბრძოლა წარმოადგენდა. მას ახლო მეგობრობა აკავშირებდა სამხრეთ ვაზირისტანში კიდევ ერთ მნიშვნელოვან მოთამაშესთან, მოლა ნაზირთან (მიუხედავად იმისა, რომ ნაზირის გამოძევებული უზბეკი მუჯაჰიდები მიიღო). მუჯაჰიდთა კავშირის საბჭოს (SIM) ხანმოკლე და წარუმატებელი ფუნქციონირების შემდეგ ბაჰადურმა ხელისუფლებასთან კვლავ მოლაპარაკების პოზიცია დაიჭირა. მან ანტი-პაკისტანური დაჯგუფება დატოვა, თუმცა მეჰსუდის კლანის სამხრეთელი წევრების შეფარებაზე უარი არ უთქვამს.

2012 წელს ჩრდილო და სამხრეთ ვაზირისტანში ახალი გაერთიანების ჩამოყალიბება დაანონსდა, რომელშიც ცენტრალური თთპ, გულ ბაჰადურისა და მოლა ნაზირის ჯგუფები და ჰაკანის ქსელი მოიხრებოდნენ. მოლაპარაკებებს ალ-კაიდას წარმომადგენელი აბუ იაჰია ალ-ლიბიც ესწრებოდა⁴². „მურა მარაქაბამ“⁴³ მიზნად დაისახა შიდა უთანხმოებათა გვერდზე გადადება და მოლა ომარის ავტორიტეტის ქვეშ გაერთიანება. თუმცა, მხარეთა შორის ახალი გაუგებრობები აღმოცენდა⁴⁴. ალიანსმა ვერ შეძლო ჩრდილო ვაზირისტანში თალიბანის მოძრაობებს შორის დაპირისპირების ტრადიციული მიზეზი გადაეჭრა (პრო და ანტიპაკისტანური ჯგუფები).

³⁹ retrieved from: *Mapping Militant Organizations. "Haqqani Network."* Stanford University. Last modified July 2018.

<https://cisac.fsi.stanford.edu/mappingmilitants/profiles/haqqani-network>

⁴⁰ ჰაკანების ქსელი მირამ-შაჰიდან იმართება, თუმცა უმეტესად ლოია პაქტიაში, ავღანეთშია (პაქტიას, პაქტიქას და ხოსტის პროვინციები) აქტიური. ქსელი 1980-ანი წლებიდან მჭიდროდ თანამშრომლობდა უწყებათშორის დაზვერვასთან, რამაც ჯალალუდინ ჰაკანის პაკისტანში მოქმედების მეტნაკლები თავისუფლება მოუპოვა. ჰაკანები ყოველთვის ცდილობდნენ ავტონომიურობის შენარჩუნებას. დღემდე გაურკვევლად რჩება დაჯგუფების ავღანეთის თალიბანთან ურთიერთობის ზუსტი ფორმა (დღეს სირაჯუდინ ჰაკანი ამირის მოადგილის პოსტს იკავებს).

⁴¹ Peters, Gretchen. გვ. 79-81

⁴² Bergen, Peter & Tiedemann, Katherine (eds). გვ. 151-152

⁴³ ხუთწევრიან საბჭოში მაულვი (მოლა) აზმათულა (თთპ-ს ვალი რეჰმანის ჯგუფიდან), ნურ საიდი (თთპ-ს ჰაქიმულას ჯგუფიდან), საიდულა (ჰაკანის ქსელიდან), მოლა საფდარ ჰაიათი (ჰაფიზ გულ ბაჰადურის ჯგუფიდან) და ამირ ჰუმზა (მაულვი ნაზირის ჯგუფიდან) შევიდნენ.

⁴⁴ თთპ და ჰაკანის ქსელი ქურამის პროვინციაში ჰაკანების ძველი სამხედრო ბაზის მიტაცებაზე დაობდნენ.

ჩრდილო ვაზირისტანში, კიდევ ერთ, დამოუკიდებელ დაჯგუფებას ჰაკ ნავაზ დაური⁴⁵ მეთაურობს დაურთა ტომიდან. ჯგუფი უმეტესად მირ ალიში ოპერირებს და პაკისტანის არმიასთან პირდაპირ შეტაკებებს ერიდება. ჰაკ ნავაზი, უცხოელ, მათ შორის უზბეკ მებრძოლებთან თანამშრომლობს. პროვინციაში 1999 წლიდან ჯაიშ-ე-მუჰამადის (JeM) დანაყოფიც ფუნქციონირებს, რომელსაც სათავეში მასუდ აზჰარი ჩაუდგა. ჩვეულებრივ, პანჯაბელებით დაკომპლექტებული გაერთიანება მირამ შაჰის სიახლოვეში განთავსდა და მჭიდრო კავშირშია კარი ჰუსაინთან (თთპ-ს ანტი-პაკისტანური ფრაქცია).

2014 წლამდე პაკისტანის არმიას ჩრდილო ვაზირისტანში მასშტაბური სამხედრო ოპერაცია არ განუხორციელებია. 2004 წელს სამხრეთ ვაზირისტანში ჩატარებული ოპერაციის შედეგად ჩრდილოეთს ათასობით პუშტუნი და უცხოელი მებრძოლი მიანყდა. ჩრდილოეთ ვაზირისტანი, სამხრეთისგან განსხვავებით, შიდა განხეთქილებისკენ ნაკლებად მიდრეკილი აღმოჩნდა. 2009 წელს დადებული სამშვიდობო შეთანხმებით ჩრდილო ვაზირისტანში თთპ-ს კუთვნილი სატრანსპორტო საშუალებები საკონტროლო-გამშვებ პუნქტებზე შემოწმებას არ ექვემდებარებოდნენ. ამან თალიბებს ხელი გაუხსნა ადამიანებისა და იარაღის კონტრაბანდისთვის. პროვინცია ძირითად საცეცხლე წერტილს წარმოადგენდა აშშ-ის „დრონებით“ განხორციელებული დაბომბვებისთვის (2009 წელს სულ 53-დან 22 ოპერაცია ჩრდ. ვაზირისტანში; 2010-12 წლებში სულ 200-დან 154). მდგომარეობა კარდინალურად შეიცვალა ოპერაცია „ზარბ-ე-აზბის“⁴⁶ ჩატარებიდან ერთი წლის შემდეგ, რამაც რეგიონში თთპ-ს საქმიანობა საგრძნობლად შეზღუდა.

თთპ FATA-ს სხვა პროვინციებში

ბაჯური (ადმ. ცენტრი - ხარი) FATA-ს ყველაზე პატარა პროვინციაა, რომელიც სვატის ველსა და ავღანეთის ქუნარის პროვინციას შორის ქიშკარს წარმოადგენს. თთპ-ს ადგილობრივ განშტოებას მოლა ფაკირ მოჰამადი⁴⁷ ხელმძღვანელობს. ბაჯურის თალიბანის საკვანძო ფიგურად ითვლება კარი ზია-ურ რაჰმანი, რომელიც ავტორიტეტით სარგებლობს „დიურანის ხაზის“ გასწვრივ მცხოვრებ პუშტუნებში.

1993 წელს მაულვი ფაკირი TNSM-ს საქმიანობაში ჩაერთო და სუფი მუჰამადის მოწაფე გახდა, რომელთან ერთადაც „ჯამაათ-ე-ისლამის“ (ისლამისტური პარტია) პოლიტიკურ მოძღვრებას ავრცელებდა. ის თან ახლდა მუჰამადს 2001 წლის ავბედით „ექსპედიციაში“. ამ ხნის განმავლობაში იგი ავღანურ თალიბანს დაუახლოვდა. თთპ-ს დაარსების შემდეგ ფაკირ მუჰამადი ბაითულას მარჯვენა ხელად ითვლებოდა. იგი მხარს უჭერდა ე. წ. „საერთაშორისო ჯიჰადის“ ერთიანობის იდეას, რომელიც ალ-კაიდას (უსამა ბინ ლადინი) და თალიბანს (მოლა ომარი) არსობრივად ერთ სტრუქტურად სახავს⁴⁸. სვატის თთპ-ს მეთაურის მსგავსად, ფაკირ მუჰამადსაც კარგად ჰქონდა გააზრებული მედია-პროპაგანდის როლი, რასაც ინტენსიური რადიო-მაუნყებლობით ახერხებდა.

⁴⁵ Bergen, Peter & Tiedemann, Katherine (eds). გვ. 149-150

⁴⁶ Ahmed, Khaled. *Sleepwalking to Surrender: Dealing with Terrorism in Pakistan*. Penguin Haryana: Random House India, 2016, გვ. 45-46

⁴⁷ Khan, Mukhtar A. *Bajaur Agency: The New Landscape of Insurgency in FATA*. Terrorism Monitor, Volume 8 (6), Jamestown Foundation, February 2010 <http://bit.ly/2lPIldZR>

⁴⁸ „ჩვენ ვფიქრობთ, რომ მოლა ომარი და ბინ ლადინი ჩვენი უზენაესი ლიდერები არიან. თუმცა უსამას ჩემს სახლში დამე არ გაუთევია, ვფიქრობ, რომ თუ მეწვევა, ჩვენ მას ხელგაშლილები მივიღებთ“. „ჩვენ და მოლა ომარი ერთნი ვართ, ჩვენს მოძრაობებს შორის განსხვავება არ არსებობს“.

2009 წელს ბაითულას დაღუპვის შემდეგ ფაკირ მუჰამადმა თთპ-ს დროებითი ხელმძღვანელობა ითავა, რომელიც ორი დღის შემდეგ ჰაქიმულა მეჰსუდის სასარგებლოდ დათმო⁴⁹.

ბაჯაურში „ჯაიშ-ე-ისლამიც“ იყო წარმოდგენილი, რომელსაც ვალი-ურ რეჰმანი⁵⁰ მეთაურობდა (ბაითულას სიკვდილის შემდეგ ის სვატში მეჰსუდის ტომის ლიდერად აირჩიეს).

მოჰმანდის პროვინციაში ომარ ხალიდის ჯგუფი დომინირებს, რომელიც ბაითულა მეჰსუდის ჯგუფთან ანტი-პაკისტანურ პროფილს იზიარებდა. 2009 წელს ომარ ხალიდი თავის მოადგილესთან (კარი შაქილი) ერთად ავღანეთში გაიქცა (მოჰმანდში ჩატარებული სამხედრო ოპერაციის გამო). აღსანიშნავია, რომ მოჰმანდში თთპ-ს ჰეგემონიას წინ სახალხო „ლაშქრები“ აღუდგნენ, რამაც რეგიონზე თალიბანის კონტროლი ერთგვარად შეაფერხა.

ე.წ. შუა (ცენტრალურ) პროვინციებში (ქურამი, ხიბერი, ორაქზაი) „პაკისტანის თალიბანის“ ძალაუფლება ჰაქიმულა მეჰსუდმა გაავრცელა. ნიშანდობლივია, რომ თთპ-ს აქტივობა რეგიონული თავისებურებებით ხასიათდება. „შუა პროვინციებში“ მოქმედი თთპ ავღანურ ჯიჰადში პირდაპირ არ მონაწილეობს (ის ძირითადად პაკისტანის ტერიტორიაზე გამავალი სატვირთო მარშრუტების ჩაშლითაა დაკავებული). ქურამის მოსახლეობა (უმეტესად ტურის ტომი), პუშტუნთა უმრავლესობისგან განსხვავებით, შიიტური ისლამის მიმდევარია⁵¹. ამან ჰაქიმულას მწვავე სექტარიანული პოლიტიკის გატარებისგენ უბიძგა, რომელიც შიიტების უკიდურესი შევიწროებით დასრულდა. ხიბერში ფუნქციონირებს „ლაშქარ-ე-ისლამი“, (მანგალ ბალის ჯგუფი) რომელიც სხვა ისლამისტურ დაჯგუფებასთან, „ანსარ-ულ-ისლამთანაა დაპირისპირებული“⁵² (შიდა სუნიტური ჯახი დეობანდისტებსა და ბარელვის მიმდევრებს შორის).

⁴⁹ Bergen, Peter & Tiedemann, Katherine (eds). გვ. 321-323

⁵⁰ Khattak, Daud. *A Profile of Khan Said: Waliur Rahman's Successor in the Pakistani Taliban*. Sentinel Vol. 6 (6), West Point: CTC, June 2013

⁵¹ Dressler, Jeffrey. *Haqqani Network Influence in Kurram and its Implications for Afghanistan*. Sentinel Vol. 4 (3), West Point: CTC, March 2011

⁵² Siddique, Qandeel. გვ. 37-38

თოპ სვატში

ხაიბერ-პახტუნხვას პროვინციის ერთ-ერთი რეგიონი, რომელიც ჰინდუქუშის მთათა სისტემის ძირში მდებარეობს, ოდესღაც „აზიის შვეიცარიის“ სახელით იყო ცნობილი. სვატის „თალიბანიზაციას“ ხანგრძლივი ისტორია აქვს, რომელიც კარგა ხნით უსწრებს წინ თოპ-ს ჩამოყალიბებას. რეგიონის შესამჩნევად სწრაფი რადიკალიზაციის მიზეზების ძიებას პაკისტანის დამოუკიდებლობის წლებისკენ მივყავართ. სვატის ტერიტორიაზე დამოუკიდებელი სახელმწიფო არსებობდა, რომელსაც ვალი (მთავარი) განაგებდა. 1949 წელიდან მართვის სადავეები ხელში მიანგულ ჯაჰანზებმა აიღო (ვალი-ე-სვატად წოდებული), რომლის მმართველობას კეთილდღეობასა და აღორძინებას უკავშირებენ. 1969 წელს სვატი პაკისტანის ისლამურ რესპუბლიკას შეუერთდა, რამაც თვითმმართველობას სერიოზული საფრთხე შეუქმნა. ცხოვრების დონე გაუარესდა, შენელდა სამართლისწარმოება, აღარ ახლდებოდა ინფრასტრუქტურა, დაკნინდა ადგილობრივი საბჭოების (ჯირგა) როლი.

ავღანეთში თალიბების ძალაუფლების სათავეში (1996 წელს) მოსვლას სვატის მოსახლეობის დიდი ნაწილი კეთილგანწყობით შეხვდა. ისლამისტი მებრძოლები, ჯერ კიდევ „საბჭოთა ჯიჰადის“ ეპოქიდან, პუშტუნთა თავისუფლების დამცველებად ითვლებოდნენ. ამგვარმა განწყობებმა კარი გაუხსნა რადიკალური მოსაზრებების პოლიტიკოსს („ჯამაათ-ე-ისლამის“ პარტიიდან), რათა საკუთარი საქმიანობა რელიგიურ სიბრტყეზე გადაეტანა. 1989 წელს სუფი მუჰამადმა (წარმოშობით სვატის მოსაზღვრე ქვედა დირის რეგიონიდან) საკუთარ პარტიას ზურგი აქცია და საფუძველი ჩაუყარა „თეჰრიქ-ე-ნიფაზ-ე-შარიათ-ე-მუჰამადის“⁵³ (მუჰამადის შარიათის განხორციელების მოძრაობა). თავდაპირველად მშვიდობიანმა რელიგიურმა გაერთიანებამ გასამხედროებელი ფორმა მიიღო, როდესაც სუფი მუჰამადმა და მისმა მიმდევრებმა⁵⁴ გზების ჩახერგეს და მთავრობას დაუმორჩილებლობა გამოუცხადეს. TNSM-ს მთავარ მოთხოვნას შარიათის კანონმდებლობად გამოცხადება წარმოადგენდა. 1994 წელს პაკისტანის სასაზღვრო კორპუსთან (FC) შეტაკებების შედეგად ამბოხება შეთანხმებით დასრულდა. სუფი მუჰამადმა მალაქანდის ოლქში (KPP) „ნიზამ-ი-ადლის“ ამოქმედებას მიაღწია, რაც, ფაქტობრივად, თეოკრატიის დამყარებას ნიშნავდა. 1990-ების მიწურულს მოსახლეობაში მუჰამადის ავტორიტეტი უკიდურეს ნიშნულამდე დაეშვა, რის შედეგადაც მას მიმალვა მოუხდა.

2001 წლის 11 სექტემბრის ტერაქტი და აშშ-ს ავღანეთში ინტერვენცია სუფი მუჰამადისთვის მაშველი რგოლი აღმოჩნდა. ის სათავეში ჩაუდგა სვატიდან და მეზობელი რეგიონებიდან მოხალისეთა სახალხო ლაშქარს (პუშტ. „ლაშქარ“). მუჰამადის ათი ათასამდე დარაზმულმა მიმდევარმა ავღანეთში კოალიციის ძალებთან ბრძოლისას კრახი განიცადა. სუფი მუჰამადი მებრძოლთა ოჯახების რისხვის ასაცილებლად (რომლებიც მას ახლობლების განჩრვისთვის პასუხისმგებლობას აკისრებდნენ) პაკისტანის უშიშროების ორგანოებს ჩაბარდა⁵⁵. სუფი მუჰამადის დაკავებამ სვატის ჯიჰადისტურ წრეებში ვაკუუმი წარმოშვა, რომელიც მისივე სიძემ შეავსო (მან საპყრობილე 2003 წელს დატოვა).

⁵³ Abbas, Hassan. *The Taliban Revival - Violence and Extremism on the Pakistan-Afghanistan Frontier*. 140-141

⁵⁴ თავსაბურავის გამო „შეჩალმიანებად“ წოდებულები.

⁵⁵ Ibid.

ფაზლ-ე-ჰაიათი (შემდგომში ცნობილი, როგორც ფაზლულა), ზოგიერთი წყაროს მიხედვით, სვატის ერთ-ერთ სამთო კურორტზე მძლოლად მუშაობდა და ფორმალური რელიგიური განათლება (მუჰამადისგან განსხვავებით) არ მიუღია⁵⁶. თუმცა, ამას მისთვის ქადაგებასა და მხარდამჭერების „დამოდვრაში“ ხელი არ შეუშლია. ფაზლულას კიდევ ერთი მეტსახელი („მოლა რადიო“, ან „მოლა FM“) მის მიერ რადიომუწყებლობის აქტიურად გამოყენებას უკავშირდება⁵⁷. მინიმალური დანახარჯებით ფაზლულამ ეფექტიანი საკომუნიკაციო არხი გამართა, ხოლო მისი მსმენელების აუდიტორიამ მთელი რეგიონი მოიცვა. ფაზლულას მგზნებარე სიტყვებმა მალევე მიიპყრეს TNSM-ს ყოფილი მხარდამჭერების ყურადღება.

ფაზლულას აღმასვლაში გარდატეხის წერტილი 2005 წელს მომხდარი მიწისძვრა აღმოჩნდა, რომელმაც ხაიბერ-პახტუნხვას პროვინცია საგრძნობლად დააზარალა. ფაზლულას ჯგუფი ენერგიულად ჩაება დაზარალებულთა დახმარების პროცესში, რამაც პროზელიტიზმი გააიოლა. მოლას განმარტებით, ბუნებრივი კატასტროფა „შარიათის დაუმორჩილებლობის მიზეზით გამოგზავნილ ღვთაებრივ სასჯელს წარმოადგენდა“⁵⁸. ფაზლულას ექვემდებარებოდა შურა/საკონსულტაციო საბჭო (30-50 წევრი), რომელიც მოძრაობის ძირითად სათათბირო და სამეთაურო სტრუქტურას წარმოადგენდა. სვატის შურამ დასჯის შუასაუკუნეობრივი მეთოდები აღადგინა, რამაც მოსახლეობის ნაწილში პროტესტი გამოიწვია. ფაზლულა ენერგიულად ეწინააღმდეგებოდა პოლიომიელიტის ვაქცინის კამპანიას (იგი აშშ-ს მიერ „პაკისტანელების სტერილიზების მცდელობად“ მონათლა)⁵⁹. ძალაუფლების განსამტკიცებლად მან რელიგიური საპოლიციო რაზმი („შაჰინის ძალები“) ჩამოაყალიბა, რომელსაც „ქალაქებში პატრულირება და საზოგადოებრივი წესრიგის დაცვა დაევალოთ“⁶⁰.

დაფუძნების დღიდან პაკისტანის თალიბანში სვატის ჩართვა ორგანიზაციის ფართო გეოგრაფიაზე (და ამბიციებზე) მიუთითებდა. ფაზლულა თთპ-ს ჩამოყალიბების პირველ დღეებში შეუერთდა და სვატის რეგიონში ორგანიზაციის მეთაურობა ჩაიბარა. ამან ფაზლულას, გავლენის გარდა, დამატებითი სამხედრო რესურსი მოუტანა (ძირითადად თთპ-ს მხარდამჭერი მებრძოლები პენჯაბიდან და უზბეკეთიდან). თთპ-სა და TNSM-ის დაახლოებასა და ინტერესთა თანაკვეთაში წვლილი შეიტანა „ლალ მასჯიდში“ (წითელი მეჩეთი) ჩატარებულმა რეიდმა, რომლის მადრასების სტუდენტთა დიდი ნაწილი სვატის რეგიონიდან იყო. ფაზლულა ერთ-ერთ ინტერვიუში აცხადებს, რომ ჯიჰადის ახალი ტალღა სწორედ მეჩეთზე თავდასხმამ აღძრა⁶¹.

ადგილობრივი ხელისუფლების პირველ ანგარიშგასაწევ წინააღმდეგობას მოლა ფაზლულა 2007 წლის ოქტომბერში წაანყდა, როდესაც NWFP-ის მთავრობამ სვატის 59 სოფელში გამაგრებული „თალიბანის“ აღმოსაფხვრელად კამპანია წამოიწყო⁶². ნოემბერში ანტიტერორისტული კამპანიის მსვლელობაში პაკისტანის არმია ჩაერთო (ოპერაცია „სამართლიანი გზა“).

⁵⁶ Khattak, Daud. *Who is Mullah Fazlullah*. Foreign Policy, November 2013 <http://bit.ly/2Oym9Gz>

⁵⁷ McCoy, Terrence. Mullah Radio: the Radical Broadcaster Leading the Taliban's War on Pakistani Schoolchildren. The Washington Post, December 2014 <https://wapo.st/2oqXCbJ>

⁵⁸ Abbas, Hassan. *The Taliban Revival - Violence and Extremism on the Pakistan-Afghanistan Frontier*. გვ. 145-146

⁵⁹ Roul, Animesh. *The Pakistani Taliban's Campaign Against Polio Vaccination*. West Point: CTC 7(8), August 2014

⁶⁰ Bergen, Peter & Tiedemann, Katherine (eds). გვ. 301

⁶¹ „მე მოვუწოდე ჩემს მიმდევრებს ჯიჰადისთვის მზადყოფნისკენ. ის, რაც სვატში დაიწყო, უკავშირდება არა ჩემს განცხადებას, არამედ მთავრობის განხორციელებულ ოპერაციას ლალ მასჯიდსა და ჯამია ჰაფსაში. ყოველი პაკისტანელის ვალდებულებაა, იარაღი აისხას მათ წინააღმდეგ, ვინც საკუთარ ხალხს ბომბავს“. Siddique, Qandeel. გვ. 39-40

⁶² Basit, Abdul. *Mullah Fazlullah: A Journey from FM Mullah to Head of the Pakistan Taliban*. Counter Terrorist Trends and Analysis 6(10), International Centre for Political Violence and Terrorism Research, November 2014, გვ. 13-16

მძიმე არტილერიის ცეცხლის ქვეშ თალიბანის მებრძოლებმა ფაზლულას რეზიდენცია (მამ დერი) მიატოვეს და თავი მთებს შეაფარეს. უკანდახევის მიუხედავად, სვატის თალიბანის წევრები პერიოდულად თავს ესხმოდნენ პაკისტანის უშიშროების ძალებსა და პოლიციას. ადგილობრივმა მთავრობამ (ANM) თთპ-სთან დაზავება განიზრახა და მოლაპარაკების დაწყებისათვის, კეთილი ნების უესტად, სუფი მუჰამადი გაათავისუფლა. 2008 წლის მაისში მხარეებმა ხელი მოაწერეს თექვსმეტპუნქტიან შეთანხმებას, რომელიც სვატში შარიათის კანონმდებლობის დამყარებას, ცეცხლის შეწყვეტასა და თავდაუსხმელობას ითვალისწინებდა. ამავე წლის ივნისში ფაზლულამ დაზავების პირობად პაკისტანის შეიარაღებული ძალების მიერ სვატის დატოვება წამოაყენა, რაზეც მთავრობამ თალიბანის წევრების განიარაღების მოთხოვნით უპასუხა. შეთანხმებას ცეცხლის განახლება მოჰყვა. სვატის თალიბანმა რეგიონში სრულ ჰეგემონიას მიაღწია, რამაც 2009 წლამდე გასტანა. პაკისტანის პოლიცია მხოლოდ ქ. მინგორას გაკონტროლებას ახერხებდა. 2009 წლის თებერვალში მიღწეულმა შეთანხმებამ სვატში თთპ-ს ძალაუფლება დე-ფაქტო დააკანონა („ნიზამ-ე-ადლის“ რეგულაცია) და ფაზლულას გავლენამ მაქსიმალურ საზღვარს მიაღწია (ე. წ. Taliban overreach)⁶³.

პაკისტანის არმიის მეორე მცდელობა, თალიბანის ფესვები სვატში სისტემურად ამოეძირკვა, უფრო წარმატებული აღმოჩნდა. ოპერაცია „რაჰ-ე-რაასთის“ (მართალი გზა) მოსამზადებელ პერიოდში რეგიონი 2,5 მილიონმა მაცხოვრებელმა დატოვა. ამან შეიარაღებულ ძალებს ხელი გაუხსნა მოწინააღმდეგეზე პირდაპირი იერიშის მისატანად. ოპერაციის განმავლობაში თთპ-ს მრავალი საველე ლიდერი დაიღუპა (მათ შორის, ფაზლულას სპიკერი მუსლიმ ხანი), განადგურდა თალიბანის სამხედრო ინფრასტრუქტურა და იარაღის სამალავები. 2009 წლის ივლისში არმიამ ტერორიზმისგან სვატის სრულად გათავისუფლება გამოაცხადა⁶⁴. 2009 წლის კამპანიას რამდენიმე ფაქტორი გამოარჩევს. 2008-2009 წლებში თთპ-ს განხორციელებულმა ტერორმა საზოგადოებრივ აზრს კალაპოტი შეაცვლევინა⁶⁵. ოპერაციის წარმატებაში მნიშვნელოვანი როლი შეასრულეს მოსახლეობის რიგებიდან შემდგარმა „ლაშქრებმა“, რომლებიც არმიას ადგილობრივ რელიეფში მუშაობას უადვილებდნენ. აგრეთვე, ანტიტერორისტული კამპანიის დაგეგმვაში გამოიკვეთა მთავრობის პოლიტიკური ნება, სვატში თთპ-ს მმართველობა საბოლოოდ აელაგმა. შესაბამისად, უარი ითქვა არარეგულარული შეტევების განხორციელებასა და დროდადრო დაზავების ტაქტიკაზე. მოლა ფაზლულას, სამხედრო ზენოლის შედეგად, სვატიდან ავღანეთში გაქცევა მოუწია⁶⁶, ხოლო სუფი მუჰამადი კვლავ დააკავეს. ფაზლულა პაკისტანში 2013 წლის დეკემბერში დაბრუნდა, როდესაც (ჰაქიმულა მეჰსუდის სიკვდილის შემდეგ) იგი უკვე ცენტრალური თთპ-ს ამირად აირჩიეს⁶⁷.

⁶³ Bergen, Peter & Tiedemann, Katherine (eds). გვ. 308

⁶⁴ *Pakistan Army Claims Control of Main Swat Town*. New York Times, May 2009 <https://nyti.ms/2pW8TkN>

⁶⁵ Bergen, Peter & Tiedemann, Katherine (eds). გვ. 309

⁶⁶ *Taliban Leader flees Pakistan*. BBC Urdu, Peshawar <https://bbc.in/2LWiu3A>

⁶⁷ *Mullah Fazlullah in Pakistan's tribal areas: spokesman*. The Dawn, December 2013 <http://bit.ly/2VqVsVG>

თოპ პენჯაბსა და სინდში

პენჯაბი პაკისტანის ყველაზე მჭიდროდ დასახლებული პროვინციაა (მოსახლეობა - დაახლ. 110 მილიონი სული) და პოლიტიკური, ეკონომიკური და დემოგრაფიული თვალსაზრისით ქვეყნის ცენტრალური ნაწილია. ის მუსლიმი ექსტრემისტებისა და ჯიჰადისტების ერთ-ერთ ყველაზე მსხვილ კერას წარმოადგენს. უკვე დიდი ხანია, რაც ალ-კაიდასა და პუშტუნთა თალიბანის პენჯაბთან კავშირები დასტურდება, თუმცა ბოლო დრომდე პაკისტანის ხელისუფლება ტერორიზმის მთავარ სავანედ მხოლოდ ვაზირისტანსა და ხიბერ-პახტუნხვას პროვინციას მოიაზრებდა.

პენჯაბელი რეკრუტები ძირითადად „ქაშმირის ჯიჰადში“ იყვნენ ჩაბმულები. სანვრთნელ ბაზებში ყოფნისას მათ ნაწილს „პაკისტანის თალიბანის“ მომავალ წევრებთან ახლო ურთიერთობა ჩამოუყალიბდა. ჰასან აბასის მტკიცებით, „პენჯაბის თალიბანი პენჯაბური წარმოშობის ექსტრემისტთა მყიფე კონგლომერაციას წარმოადგენს, რომლებიც იდეოლოგიურად და პრაქტიკულად თოპ-ს, ავღანურ თალიბანს და KPP-ში მოქმედ სხვა ორგანიზაციებთან არიან დაკავშირებულები“⁶⁸. პენჯაბის თალიბანის წევრთა უმრავლესობამ ინიციატორ პროვინციაში გავრცელებულ ჯიჰადისტურ დაჯგუფებებში (SSP, LeJ, JeM), ან მათ „მშობელ“ ორგანიზაციებში (HUJI, HUM) გაიარა⁶⁹.

2001-2006 წლებში პაკისტანის ტერორისტული რუკა შემდეგნაირად იყო დაყოფილი: ჩრდილო-დასავლეთში მოქმედი (ტერორისტული) ჯგუფები ძირითადად ავღანეთში საერთაშორისო კოალიციასთან ბრძოლით იყვნენ დაკავებული, ხოლო აღმოსავლეთის პროვინციებში არსებული SSP-ს, JeM-სა და LeJ-ის „მზერა“ ქაშმირისა და ინდოეთისკენ იყო მიპყრობილი. 2006-2007 წლებში აღნიშნული სტატუს-კვო პაკისტანის ხელისუფლების პოლიტიკის ცვლილებამ ამოაყირავა (ინდოეთთან ურთიერთობის დათბობა და ქაშმირში ექსტრემისტებისთვის მხარდაჭერის შეძენა). ორ ფრთას შორის თანაკვეთა განსაკუთრებით აშკარა 2007 წელს „წითელ მეჩეთში“ ჩატარებული ოპერაციის შემდეგ გახდა, რაც მათ წინააღმდეგ მიმართულ გადამწყვეტ ზომებად აღიქვეს. ამას ჩრდილოეთ და სამხრეთ პენჯაბის პროვინციებიდან ვაზირისტანში ახალწვეულთა მასობრივი გადინება მოჰყვა (5000-მდე პირი). FATA თვითმკვლელ ტერორისტთა „ქარხანად“ გარდაიქმნა, რომელსაც ადამიანური რესურსით პენჯაბი ამარაგებდა. აღსანიშნავია, რომ პენჯაბელების ინდოქტრინაციაში აქტიურად ჩაერთვნენ თოპ-ს ერთგული მოკავშირე ალ-კაიდას ლიდერები (მგ. შეიხი ისა ალ-მასრი)⁷⁰. ამან არაპუშტუნი ჯიჰადისტების გადაბირება მნიშვნელოვნად გააიოლა.

თოპ-ს დაფუძნების შემდეგ პენჯაბელებთან თანამშრომლობა უფროდაუფრო მჭიდრო ხდებოდა⁷¹. 2009 წლის ივნისში პაკისტანის შინაგან საქმეთა მინისტრმა, რეჰმან მალიქმა სამხრეთ პენჯაბში „სვატის სცენარის“ განმეორება ივარაუდა⁷², თუ აშშ-ს „დრონების“ დაბომბვებს გადარჩენილი მუჯაჰიდები თავს LeJ-სა და JeM-ს შეაფარებდნენ.

⁶⁸ Abbas, Hassan. *Defining the Punjabi Taliban Network*. Sentinel Vol 2 (4) West Point: CTC, April 2009

⁶⁹ Ibid. აღნიშნული ჯგუფებისთვის იდეოლოგიური ნიადაგი 1977-1988 წლებში, პრეზიდენტ ზია ულ-ჰაკის ეპოქაში მომზადდა, რომელმაც პოლიტიკური ისლამის ინსტრუმენტალიზაცია დაიწყო.

⁷⁰ Khan, Raheel. *Untangling the Punjabi Taliban Network*. Sentinel Vol 3(3), West Point: CTC, March 2010

⁷¹ თოპ-ს ორმოცნევრიან საბჭოში (შურა) პენჯაბის თალიბანის ქსელის წევრებიც იყვნენ წარმოდგენილები.

⁷² Ibid.

2009 წლის ოქტომბერში პაკისტანის უსაფრთხოების ძალებმა იკბალ და გულ მუჭამადები დააკავეს, რომლებსაც ბრალი ედებოდათ „ვაზირისტანში თოპ-ს ხელმძღვანელობის თანამშრომლობაში“⁷³. დადგინდა, რომ მათ საკვანძო როლი შეასრულეს პაკისტანის არმიის გენერალურ შტაბზე (GHQ) განხორციელებული თავდასხმის კოორდინირებაში⁷⁴. ამასთან, თანამშრომლობის მასშტაბი ქაშმირის კონფლიქტურ რეგიონზეც გავრცელდა. 2009 წლის ივნისიდან 2010 წლის იანვრამდე პენჯაბის თოპ-მ ხუთი ტერორისტული აქტი განახორციელა პაკისტანის ადმინისტრირებულ ტერიტორიაზე (აზად-ქაშმირი). ნიშანდობლივია, რომ ტერორისტთა შორის მრავალი „ქაშმირის ჯიჰადის“ ყოფილი მონაწილე იყო (რომლებიც მხარდაჭერას პაკისტანის სახელმწიფოსგან იღებდნენ).

პენჯაბური დეობანდისტური დაჯგუფებები ავღანეთის თალიბანთან (მათი ხელისუფლებაში მოსვლის დროიდან) მტკიცე კავშირებით გამოირჩეოდნენ⁷⁵. თუმცა, თოპ-ს თალიბანთან შერწყმამ, ისევე როგორც ალ-კაიდასთან დაახლოებამ ავღანელებთან ურთიერთობა შეასუსტა. ისევე როგორც თოპ-ს პუშტუნური ფრთა, პენჯაბელები პაკისტანის სამხედრო და სამოქალაქო პირებზე პირდაპირი თავდასხმისგან თავს არ იკავებდნენ, რაც ავღანური თალიბანის წყრომას იწყვეს. პენჯაბური თოპ-ს ალ-კაიდასთან აფილირებამ მათი ავტორიტეტი მნიშვნელოვნად დააზარალა⁷⁶.

თოპ პაკისტანის კიდევ ერთ, სინდის პროვინციაშია წარმოდგენილი. 2013 წელს პაკისტანის საპარლამენტო არჩევნების წინ თოპ-ს წევრებმა ქ. კარაჩიში ავამის ეროვნული პარტიის (ANP) კანდიდატი მოკლეს. არჩევნების დღეს თოპ-ს თვითკვლელმა ტერორისტებმა ANP-ს სხვა კანდიდატის, ამანულა მეჰსუდის აფეთქება სცადეს. კარაჩიში⁷⁷ თოპ-ს კვალს 2009 წლიდან შეიძლება მივაგნოთ როდესაც FATA-სა და ხპპ-დან ტერორისტების მასობრივი ინფილტრაცია განხორციელდა (ძირითადად იქ მიმდინარე სამხედრო ოპერაციების წნეხით⁷⁸). აღსანიშნავია, რომ კარაჩიში პუშტუნების უმსხვილესი დიასპორა სახლობს (დაახლ. 5 მილიონი), რომელიც ძირითადად სოციალური და ეკონომიკური მიგრანტებისგან შედგება. თოპ-ს „წარმომადგენლობა“ სამ ნაწილადაა დაყოფილი: მეჰსუდის, სვატისა და მოჰმანდის ფრაქციები. ისინი ძირითადად პუშტუნების საცხოვრებელ კვარტალებში ოპერირებენ. მათგან ყველაზე გავლენიანია მეჰსუდის ფრაქცია სამხრეთ ვაზირისტანიდან. მეჰსუდები მეტწილად მათთან დაკავშირებული (ლეგალური) ორგანიზაციების ხელით მოქმედებენ (მგ. „სამართლისა და მშვიდობის კომიტეტი“), რომლებიც პუშტუნთა თემში სამართლებრივი მედიატორისა და არბიტრის ფუნქციას კისრულობენ. სვატის უკრედი კარაჩიში 2011 წლიდანაა აქტიური. მის წევრებს მიეწერებათ ადგილობრივი პოლიტიკური ლიდერების მკვლელობა (2012 წელს)⁷⁹. მეჰსუდებისგან განსხვავებით, სვატის ფრაქცია „ფასადური“ ორგანიზაციების გარეშე მოქმედებს. მოჰმანდის ჯგუფი ძირითადად კარაჩიში მომუშავე მიგრანტებისგან თანხების გამოძალვითაა დაკავებული. კარაჩი, რომელზეც პაკისტანის ეკონომიკის მთავარი არტერია გადის, ნოყიერ ნიადაგს წარმოადგენს თოპ-სთვის საჭირო ფინანსების „მოსაზიდად“.

⁷³ Ibid.

⁷⁴ მსგავსი კვალი გამოიკვეთა 2009 წლის დეკემბერში უწყებათშორისი სამმართველოს პერსონალსა და რავალპინდში სამხედრო ბაზაში მდებარე მეჩეთზე თავდასხმებისას.

⁷⁵ HuJI-ს ლიდერი კარი საიფულა ახტარი მოლა ომარის პოლიტიკურ მრჩეველად ითვლებოდა. მოლა ომარს სტუმრობდა JeM-ს დამფუძნებელი მასუდ აზჰარიც. Khan, Raheel. 2010

⁷⁶ 2009 წელს Pew Research-ის კვლევით ალ-კაიდას რეიტინგი პაკისტანის საზოგადოებაში წინა წელთა შედარებით 25 %-დან 9 %-მდე დაკარდა. Brandt, Ben. The Punjabi Taliban: Causes and Consequences of Turning against the State. Sentinel Vol. 3 (7), West Point: CTC, July 2010

⁷⁷ პაკისტანის უმნიშვნელოვანესი საპორტო ქალაქი, რომელიც ქვეყნის ეროვნული ბანკისა და საფონდო ბირჟის ადგილსამყოფელია.

⁷⁸ Ahmar, Moonis. *Why Karachi is a Major Source of Instability in Pakistan?*. Brief 63, Pakistan Security Research Unit, January 2011

⁷⁹ Rehman, Zia U. *The Pakistani Taliban's Karachi Network*. Sentinel 6 (5), West Point: CTC, May 2013

ორგანიზაციის ლიდერი

2018 წლის ივნისში მოლა ფაზლულას სიკვდილის შემდგომ თთპ-ს მართვის სადავეები მეჰსუდების ტომმა დაიბრუნეს. მეჰსუდთა მმართველობის ხანგრძლივი პაუზის განმავლობაში ორგანიზაცია შიდა პაექრობამ ძალაუფლების მოსაპოვებისთვის შესამჩნევად დაასუსტა⁸⁰. ფაზლულას გამოკვეთილად სექტარიანულმა და ანტი-სახელისუფლებო პოლიტიკამ (რაც სისხლიან ტერორისტულ აქტებში გამოვლინდა⁸¹) თთპ-ს საზოგადოებრივი ლეგიტიმაცია გამოაცალა. ახლადარჩეული ლიდერის, ნურ ვალი მეჰსუდის გეგმაში ორგანიზაციის ადმინისტრირებისა და ტაქტიკის სრული გარდაქმნა შედიოდა.

ნურ ვალი მეჰსუდმა რელიგიური განათლება ფაისალაბადში, გუჯრანვალასა და კარაჩიში მიიღო. ის ავღანეთისა და პაკისტანის ჯიჰადისტურ წრეებში სწავლულის („ალიმის“) ავტორიტეტით სარგებლობს. 1990-ან წლებში ავღანურ ჯიჰადს შეუერთდა და მახარ-ი-შარიფისა და ჯაბალ-ულ-სირაჯის რაიონებში იბრძოდა. თთპ-ს დაფუძნების შემდეგ ის ბაითულა მეჰსუდის თანაშემწე გახდა და მოსამართლედ გაამწესეს. ნურ ვალი მეჰსუდმა მნიშვნელოვანი როლი შეასრულა 2009 წელს ISHM-ს ფორმირებასა და ალ-კაიდასთან კავშირების გამყარებაში. 2013-2015 წლებში მეჰსუდი თთპ-ს კარაჩის განყოფილებას ხელმძღვანელობდა, მოგვიანებით კი თთპ-დან გამოყოფილი მეჰსუდთა ფრაქციის (ხალიდ მეჰსუდის მეთაურობით) წევრი გახდა. 2017 წელს მეჰსუდმა 690 გვერდიანი ნაშრომი გაასაჯაროვა („მეჰსუდების რევოლუცია: სამხრეთ ვაზირისტანი ბრიტანული რაჯიდან ამერიკულ იმპერიალიზმამდე“)⁸², რომელშიც პრემიერ-მინისტრ ბენაზირ ბჰუტოს მკვლელობაზე თთპ-მ პასუხისმგებლობა იკისრა.

თთპ-ს ახალმა ლიდერმა ძალაუფლების განმტკიცება თთპ-ს თვითმკვლელი ტერორისტების ფრთის გააქტიურებით სცადა. 2018 წლის ივლისში პაკისტანში პოლიტიკური მკვლელობების ახალი ტალღა აგორდა. ამასთან, 2018 წლის სექტემბერში თთპ-ს შურამ განახლებული „ქცევის კოდექსი“ გამოაქვეყნა⁸³, რომელსაც ორგანიზაციის სტრუქტურა, სტრატეგია და ჯიჰადის წარმოების „ლეგიტიმური“ პრაქტიკა განსაზღვრა. თთპ-ს თითოეული წევრი ვალდებულია, სრული სიმკაცრით დაემორჩილოს თავისი დაჯგუფების (faction) ამირას (მეთაურს), რომელიც, თავის მხრივ, გადაწყვეტილებებს დასამტკიცებლად მთავარ ამირას (ამ შემთხვევაში, ნურ ვალი მეჰსუდს) წარუდგენს⁸⁴. შიდა-ჯგუფური დაპირისპირების აღმოსაფხვრელად დოკუმენტი მუჯაჰიდს დაკისრებულ მოვალეობათა კონკრეტულ ნაკრებს უსახავს, ხოლო ძალაუფლების „გადაცდომის“ შემთხვევაში მეზობლს სანქციები (მგ. თთპ-ს სხვა დაჯგუფებაში გადასროლა) ელოდება.

⁸⁰ Khattak, Daud. *Who will be the Next Leader of the Pakistani Taliban?* The Diplomat, June 2018 <http://bit.ly/2OlrMID>

⁸¹ არმიას დაქვემდებარებულ საჯარო სკოლაზე თავდასხმა 2014 წელს, ბაჩა ხანის უნივერსიტეტზე თავდასხმა 2016 წელს.

⁸² Zahid, Farhan. *Profile of New TTP Chief Mufti Noor Wali Mehsud: Challenges and Implications*. Research Paper, Pak Institute for Peace Studies, Apr 2019

⁸³ Jadoon, Amira and Mahmoud, Sara. *Fixing the Cracks in the Pakistani Taliban's Foundation: TTP's Leadership Returns to the Mehsud Tribe*. Sentinel Vol. 11(11), West Point: CTC, December 2018

⁸⁴ Ibid.

კოდექსი თავდასხმის „ლეგიტიმურ“ სამიზნეებს ითვალისწინებს, რომელთა შორის სახელმწიფო სტრუქტურები (არმია, პოლიცია, სასამართლო ხელისუფლება), პოლიტიკური პარტიები, „ურწმუნოები“ (რელიგიური უმცირესობების წარმომადგენლები) კვლავ ირიცხებიან⁸⁵.

2019 წლის 10 სექტემბერს აშშ-ს სახელმწიფო დეპარტამენტმა ნურ ვალი მეჰსუდი ტერორისტთა გლობალურ სიაში შეიყვანა (მეჰსუდის გარდა, ამ სიაში ჰეზბოლას, ჰამასის, პალესტინის ისლამური ჯიჰადის, "ისლამური სახელმწიფოსა" და ალ-კაიდასთან დაკავშირებული პირებია შეყვანილი).⁸⁶

თთპ-ს ტაქტიკა და დაფინანსების წყაროები

თთპ-ს არსენალში თავდასხმის ყველაზე გავრცელებულ ფორმას თვითმკვლელი ტერორისტების მიერ თავის აფეთქება წარმოადგენს. ეს თვითნაკეთი ასაფეთქებელი მოწყობილობების (improvised explosive devices) გამოყენებით ხდება.⁸⁷ ძირითად სამიზნე ობიექტებს შორის სკოლები (განსაკუთრებით გოგონათა), ასევე პაკისტანის საჯარო და სამხედრო მოხელეთა საწვრთნელი დაწესებულებებია. თთპ საგანგებო მნიშვნელობას ანიჭებს ფსიქოლოგიური ზემოქმედების საშუალებებს. თთპ-სთვის პრიორიტეტულია მოზარდების გადაბირება და იდეოლოგიური დამუშავება, ამიტომ საგრძნობი ძალისხმევა ახალგაზრდებზე ორიენტირებულ პროპაგანდას ეთმობა.⁸⁸ მოლა ნაზირი ხაზს უსვამს მოწინააღმდეგესთან (პაკისტანი, დასავლეთი) ბრძოლის ასიმეტრიულ ხასიათს⁸⁹. მისი მოსაზრებით, მეტოქის მატერიალურ-ტექნიკური უპირატესობა ადამიანურმა თავდადებას უნდა გადაწონოს, რაც ჯიჰადისთვის სიცოცხლის მსხვერპლად გაღებას გულისხმობს.⁹⁰ 2009 წლის ივლისში სვატის ოლქში ჩატარებული ოპერაციის შედეგად მოზარდ ტერორისტ-ამფეთქებელთა ბანაკიდან რეკრუტების გამოხსნა მოხერხდა. მათ შორის ერთის (13 წლის) ცნობით, ისინი ყოველდღიურად თექვსმეტსაათიან „ფიზიკურ წვრთნასა და ფსიქოლოგიურ ინდოქტრინაციას“ გადიოდნენ. მოლა ფაზლულას განცხადებით, მუჯაჰიდებს საერთო საქმისთვის (ჯიჰადი) „ყველაფრის - სახლების, ფულის, ბავშვების - დათმობა აკისრიათ“⁹¹.

ორგანიზაციის სპეციალურად მომზადებული ჯგუფები პაკისტანის უსაფრთხოების ძალებზე ე. წ. „hit-and-run“⁹² თავდასხმებს ახორციელებენ (უმეტესად, სტრატეგიულად ნაკლებად მნიშვნელოვან წერტილებზე, როგორებიცაა სასაზღვრო-გამშვები პუნქტები, მომარაგების ბაზები, საპატრულო საგუშაგოები)⁹³. ასეთ ოპერაციებს, ძირითადად, სამხედრო მოსამსახურეთა დემორალიზების და დაშინების ფუნქცია ენიჭება. აგრეთვე, პაკისტანის მთავარ ქალაქებში (როგორიცაა კარაჩი) თთპ-ს კარგად ორგანიზებული (მაფიის მსგავსი) ქსელი გააჩნია, რომელიც უფრო მსხვილმასშტაბიანი თავდასხმების დაგეგმვასა და ორგანიზებაში ცენტრალურ შტაბს ფასდაუდებელ ინფორმაციას აწვდის⁹⁴.

⁸⁵ თუმცა, ნაკლებად ნაქეზებულია ბავშვებსა და სასწავლო დაწესებულებებზე თავდასხმა.

⁸⁶ US Declares Pakistani Taliban Chief Global Terrorist. VoANews, September 10 <http://bit.ly/2Bggsol>

⁸⁷ სხეულზე მიმაგრებული (man-portable) ან სატრანსპორტო საშუალებით გადასატანი (vehicle-borne).

⁸⁸ Semple, Michael. გვ. 85-86

⁸⁹ Siddique, Qandeel. გვ. 45-46

⁹⁰ თთპ-ს ლიდერები ხშირად იხსენებენ ბადრის (624 წ.) და უჰუდის (625 წ.) ბრძოლებს, როგორც მოციქულ მუჰამადის, რაოდენობრივი და მატერიალური ჩამორჩენის მიუხედავად, სამხედრო ტრიუმფის ნიმუშებს.

⁹¹ Ibid.

⁹² უცარი თავდასხმა შემდგომი სწრაფი უკანდახევით.

⁹³ Burke, Jason. *Pakistan Taliban: a brutal tactic from a ragtag group feeling the pressure*. The Guardian, December 2014 <http://bit.ly/2Ox1933>

⁹⁴ *Pakistani Taliban Turning to Mafia-style tactics*. CBS News, February 2013 <https://cbsn.ws/2VtK9fv>

ამასთან, თთპ-სთვის გადაბირების ნაყოფიერ ნიადაგს იძულებით გადაადგილებულ პირთა (IDP) ბანაკები წარმოადგენს. IDP მოსახლეობა განსაკუთრებით მოწყვლადია თთპ-ს „საქველმოქმედო“ (relief funds) და ფინანსური „სატყუარების“ წინაშე.

თთპ-ს მთავარ საკომუნიკაციო არხს „უმარ მედია“ წარმოადგენს, რომელიც მედია-წარმოებაში წამყვან როლს თამაშობს (ჩატარებული ოპერაციების/ტერორისტული აქტების „სასარგებლო“ კუთხიდან გაშუქება). „უმარ მედია“ უმეტესწილად პუშტუნურ და ურდუს ენებზე მუშაობს. ორგანიზაციას სოციალურ მედიაზე შეზღუდული წვდომა გააჩნია. თთპ იაფად და წარმატებით იყენებს რადიომუშაობას პროპაგანდისა და იდეოლოგიური დამუშავების მიზნებით. პაკისტანის ტელეკომუნიკაციების მარეგულირებელი კომისიის მონაცემებით, 2010 წელს ქვეყნის ტერიტორიაზე 300-მდე პირატული (ლიცენზიის გარეშე მომუშავე) რადიომუშაობელი ფუნქციონირებდა⁹⁵. რადიოგადამცემის გავლით ფართო აუდიტორიას თთპ-ს მეთაურთა ქადაგებების მოსმენა შეუძლია. პერიოდულად თთპ საკუთარი ინიციატივით იწვევდა საერთაშორისო რეპორტიორების გუნდს „შიდა პერსპექტივის“ გასაშუქებლად. ამ მხრივ, აღსანიშნავია ჰაქიმულა მეჰსუდი, რომელიც ჟურნალისტების მიმართ განსაკუთრებული „კეთილგანწყობით“ გამოირჩეოდა. ორგანიზაციის შორს მიმავალი გეგმებისა და შესაძლებლობების აფიშირების მიზნით მან ორაქზაის ოლქში პრეს-კონფერენციაც კი მოიწვია. დამატებით, პაკისტანის თალიბანი აქტიურად იყენებს ავღანური ჰომოლოგის წარმოებულ ვიდეო და აუდიო პროდუქციას, რომელიც CD და DVD კომპაქტ-დისკების და „მობილური“ (cellular) ინტერნეტის მეშვეობით ვრცელდება.

თთპ-ს თითოეულ ფრაქციას ხელი დაფინანსების დამოუკიდებელი წყაროებზე მიუწვდება. თუმცა, მოქმედებდა ფინანსების მართვის ცენტრალიზებული სისტემაც, რომელიც მოძიებული სახსრების საერთო ხაზინაში აკუმულირებას და შემდგომ ტომობრივი რაიონების მიხედვით გადანაწილებას ითვალისწინებდა. ჯამში, სახსრების მოპოვების ოთხი ძირითადი საშუალება შეგვიძლია გამოვყოთ⁹⁶:

- **გატაცებები:** თთპ-ს განშტოებები (ხშირად, სხვა ტერორისტულ ჯგუფებთან „შეამხანაგებით“) გამოსასყიდის მისაღებად მდიდარ ბიზნესმენებს, ჟურნალისტებს, სამხედროებს, საჯარო მოხელეებს იტაცებენ.
- **კონტრაბანდა:** ბუნებრივი რესურსების (ძვირფასი თვლები, ხეტყე) უკანონოდ მოპოვება და ექსპორტი (განსაკუთრებით შემოსავლიანი სვატის ოლქში აღმოჩნდა); ნარკოტიკების (ძირითადად ჰეროინი) უკანონო ბრუნვა.
- **თანხის გამოძალვა:** “თალიბანიზაციის“ მოდელი სახელმწიფოს ფუნქციების შეთავსებას ითვალისწინებს, რასაც FATA-ს ტერიტორიაზე გადასახადების დანესება მოჰყვა (ზაქათი, გადაზიდვები, ტრანზაქციები), მათ შორის ჯიზია არასუნიტი მუსლიმებისთვის. დამატებით, თთპ რეგიონში მოქმედ ბიზნეს-ოპერატორებისთვის „ლიცენზიებს“ გასცემს (საფასურის გადახდის სანაცვლოდ), რაც მათ ფიზიკურ და მატერიალურ (საქონლის) უსაფრთხოებას უზრუნველყოფს.
- **შემონირულობები** (ე. წ. „ჩანდა“): თთპ-მ დიდძალი თანხა დააგროვა საერთაშორისო და ადგილობრივი ტერორისტული ორგანიზაციების ფინანსური შემწეობებით (ძირითადად, ალ-კაიდა და მასთან დაკავშირებული ფონდები; ავღანეთის თალიბანი, აგრეთვე LeJ და HuM).

⁹⁵ Siddique, Qandeel.

⁹⁶ Acharya, Arabinda et al. *Making Money in the Mayhem: Funding Taliban Insurrection in the Tribal Areas of Pakistan*. *Studies in Conflict & Terrorism*, 32 (2), February 2009, გვ. 95-108

სხვა ტერორისტულ ჯგუფებთან ურთიერთობა

პაკისტანის თალიბანში მრავალი განსხვავებული ჯგუფია შერწყმული. ორგანიზაციაში ეთნიკურად პუშტუნები დომინირებენ. განსაკუთრებულ გავლენას ძირითადად სამხრ. ვაზირისტანში განსახლებული მეჰსუდის კლანი ფლობს. ამასთან, ზოგიერთი განშტოება ყოველდღიური ოპერაციების განხორციელებისას მეტნაკლებ ავტონომიურობას ინარჩუნებს. 2008 წელს თთპ-ს მოლა ნაზირისა და ჰაფიზ გულ ბაჰადურის გამოყოფამ განხეთქილების მიზეზებს ნათელი მოჰფინა. თთპ-ს საპროგრამო მანიფესტი ახალი პოლიტიკური რეალობის მიხედვით გადაისინჯა. გახშირებული (აშშ-ს) საჰაერო იერიშები და პაკისტანის არმიის მასშტაბური ოპერაციები თთპ-ს ადგილობრივ უჯრედებს აიძულებდა, გარკვეული დათმობების სანაცვლოდ ხელისუფლებასთან მოლაპარაკებას დათანხმებოდნენ. მნიშვნელოვანი აღმოჩნდა შიდა ჯგუფური დაპირისპირებები უცხოელ მუჯაჰიდთა, ჭიჭადის წარმოების მეთოდების, შარიათის სრული უზენაესობის შესახებ. შეხედულებათა და ინტერესთა შეხლა ხშირად სხვა ექსტრემისტულ/ისლამისტურ ჯგუფებთან ურთიერთობით და მათგან ზეგავლენით იყო გამოწვეული.

ბუნებრივია, რომ თთპ-ს მთავარ “პარტნიორ” ორგანიზაციად ავღანური თალიბანი მიიჩნევა. ორივე დაჯგუფება ერთნაირად მტრულად ეკიდება მოკავშირეთა კოალიციის ინტერვენციას ავღანეთში, ისევე როგორც აშშ-ს როლს პაკისტანის უსაფრთხოების არქიტექტურაში. ერთი შეხედვით, პოტენციური ახალწვეულების თვალში თთპ-ს ავღანურ ჭიჭადთან ასოცირება ორგანიზაციას დამატებით ლეგიტიმაციას აძლევს. ამის საპირწონედ, ავღანეთის თალიბანისთვის პუშტუნებით დასახლებული ოლქები (FATA, KPP) ხელსაყრელ დასაყრდენსა და ტაქტიკური უკანდახევის წერტილს წარმოადგენს. მიუხედავად ამისა, თთპ-ს მიდრეკილებამ, წინ წამოსწიოს სექტარიანული (შიიტების საწინააღმდეგო) და ანტი-სახელისუფლებო (პაკისტანის ისლამური რესპუბლიკა) პოზიციები, მათ შორის ბზარი გააჩინა⁹⁷⁹⁸. ავღანური თალიბანის ხედვით, პრიორიტეტების აღრევა ძირს უთხრის მუჯაჰიდთა ერთობას. თთპ-ს ხელმძღვანელობის მიერ სანქცირებულ პრაქტიკას, თავს დაესხან ობიექტებს, სადაც სამოქალაქო მოსახლეობაა (განს. ბავშვები) კონცენტრირებული. ეს, (ავღანეთის) თალიბანის წარმოდგენით, ორგანიზაციას საზოგადოებრივი აზრის მხარდაჭერას დაუკარგავს⁹⁹.

უკანასკნელ ხანებამდე თთპ-ს მძლავრ მოკავშირედ ალ-კაიდა ითვლებოდა. „საბჭოთა ჭიჭადის“ ეპოქიდან ალ-კაიდას ლიდერებმა პაკისტანის ჩრდილო-აღმოსავლეთში ფეხი მოიკიდეს და სიმბიოზურ ურთიერთობაში იმყოფებოდნენ ჭიჭადის ადგილობრივი მეთაურებთან. ცნობილია, რომ უსამა ბინ ლადინი თთპ-ს ჩამოყალიბების პირველ წლებში საკმაოდ დიდი ფინანსური სახსრებითა და პრაქტიკული ცოდნით (ალ-კაიდას ინსტრუქტორების სახით) უმაგრებდა ზურგს¹⁰⁰.

⁹⁷ Khattak, Daud. *The Complicated Relationship Between the Afghan and Pakistani Taliban*. Sentinel Vol. 5 (2), West Point: CTC, February 2012

⁹⁸ *Peshawar Massacre: Afghan Taliban condemn un-Islamic Pakistan school carnage*. International Business Times, December 2014 <http://bit.ly/33ilVrj>

⁹⁹ ავღანეთის თალიბანი გავიჭრა 2014 წელს ფეშავარზე პაკისტანის არმიის ლიცენზიულ თავდასხმას (იხ. დანართი), რომელიც საფუძველში „არაისლამურად“ მიიჩნია მსხვერპლის არაპროპორციულობის და ჭიჭადის არასაკმარისად „დასაბუთების“ გამო.

¹⁰⁰ Ressler, Don. *Al-Qaida's Pakistan Strategy*. Sentinel Vol. 2 (6), West Point: CTC, June 2009

სანაცვლოდ, ბაითულა მეჰსუდი თავგამოდებით იცავდა რეგიონში ალ-კაიდას პოზიციებს და მათ რიტორიკას ირეკლავდა.

ჰაკანის ქსელთან თთპ-ს კავშირი მრავალ წელს ითვლის, რაც თავდაპირველად ოპერაციების ერთობლივად დაგეგმვითა და განხორციელებით დაიწყო (ძირითადად, თანხის გამოძალვის მიზნით გატაცებები). მათი ურთიერთქმედება ყველაზე გამოხატული ჩრდილო ვაზირისტანის პროვინციაში იყო (ხშირად, ერთი და იმავე მებრძოლი ლოიალობას ორივე ჯგუფის მიმართ ინარჩუნებდა). თთპ-სთვის ჰაკანის ქსელი ავღანეთთან (უმეტესად მოსაზღვრე ლოია პაქტიას რეგიონი) დამაკავშირებელ არხს წარმოადგენს. თუმცა, პერიოდულად, მათ შორის უთანხმოება¹⁰¹ შეიარაღებულ შეტაკებაშიც გადაზრდილა (2012).

უზბეკეთის ისლამური მოძრაობა (IMU)¹⁰² თთპ-თან პირველად 2007 წელს გადაიკვეთა, როდესაც მოლა ნაზირის გამოძევებულ მებრძოლებს მეჰსუდებმა უმასპინძლეს¹⁰³. 2012 წელს თთპ-მ და IMU-მ იერიში მიიტანეს ბანუს ციხეზე პაკისტანში, საიდანაც ოთხასი პატიმარი გაათავისუფლეს. მათ ანგარიშზეა 2014 წელს ჯინას საერთაშორისო აეროპორტის ხუთსაათიანი ალყა (იხ. დანართი). 2013 წლის იანვარში დაჯგუფებებმა საერთო ერთეულის („ანსარ ალ-ასირ“)¹⁰⁴ ჩამოყალიბება გამოაცადეს, რომელსაც დატყვევებულ მუჯაჰიდთა გამოსხნასა და მათი ოჯახების დახმარებაზე უნდა ეზრუნა. ორგანიზაციები ავღანეთში ნატო-ს ძალებზე თავდასხმების ორგანიზებაშიც თანამშრომლობენ.

„ჯუნდალა“ (არ. ალაჰის ჯარისკაცები) 2009-2013 წლებში ნაწილობრივ შეერწყა „პაკისტანის თალიბანის“ რიგებს, რადგანაც ორივე ორგანიზაციის ოპერაციულ მართვას ერთი და იგივე პირი, ჰაქიმულა მეჰსუდი ახორციელებდა. თუმცა, მეჰსუდის სიკვდილის შემდეგ „ჯუნდალამ“ ერთგულების ფიცი ახლადშექმნილ ISK-ს (ისლამური სახელმწიფო ხორასანში) გამოუცხადა¹⁰⁵.

„ლაშქარ-ე-ტაიბა“ (LeT)¹⁰⁶ დროდადრო თანამშრომლობს თთპ-ს ნევრებთან, მიუხედავად იმისა, რომ ორგანიზაციები „ქაშმირის ჯიჰადის“ მნიშვნელობას განსხვავებულად ეკიდებიან. ზოგი ცნობის თანახმად, „ლაშქარ-ე-ტაიბა“ ცდილობს, შეზღუდოს თთპ-ს უკიდურესად ანტი-პაკისტანურად განწყობილი ფრთა და მათი „ყურადღება“ ავღანეთზე, აშშ-სა და ინდოეთზე გადაიტანოს.

2014 წელს თთპ-ს შიგნით კიდევ ერთხელ დანაწევრდა, რაც კვლავ პაკისტანის მთავრობასთან სამშვიდობო მოლაპარაკებებს უკავშირდებოდა. დაჯგუფება თებერვალში „აჰრარ-ულ-ჰინდის“ სახელით ცნობილიმა გაერთიანებამ დატოვა¹⁰⁷. ამას მოჰყვა, მარტში მეჰსუდის კლანიდან სამხრეთ ვაზირისტანის (სხვაგვარად თთპ-ს სანჯას) ფრაქციის გამოყოფა, რომელიც ორგანიზაციის პრაქტიკას (გამოძალვები, გატაცებები, სამოქალაქო პირებზე თავდასხმა) „ამორალურად და არაისლამურად“ მიიჩნევდა. მოგვიანებით, თთპ-ს შეჰრიარ მეჰსუდის ჯგუფი, „ჯამაათ-ულ-აჰრარი“ („თავისუფლთა საზოგადოება“) და „პანჯაბის თალიბანის“ ნევრები ჩამოსცილდნენ

¹⁰¹ Jamal, Arif. *Haqqani Network Growing Stronger at the Expense of Tehrik-e-Taliban*. Terrorism Monitor Vol. 9 (31), Jamestown Foundation, August 2011

¹⁰² Anzalone, Christopher. *The Islamic Movement of Uzbekistan: Down but not out*. The South Asia Channel, Foreign Policy, November 2012 <http://bit.ly/35khhu>

¹⁰³ Stenersen, Anne. *The Islamic Movement of Uzbekistan's Role in Attacks in Pakistan*. Sentinel Vol. 7 (7), West Point: CTC, July 2014

¹⁰⁴ Roggio, Bill. *Taliban, IMU form Ansar al-Aseer to free Jihadist Prisoners*. Long War Journal, February 2013 <http://bit.ly/35khhuD>

¹⁰⁵ *Pakistan Taliban splinter group vows allegiance to Islamic State*. Reuters, November 2014 <https://reut.rs/2oi71Tb>

¹⁰⁶ Tellis, Ashley J. *The Menace that is Lashkar-e-Taiba*. Policy Outlook, Carnegie Endowment for International Peace, March 2012

¹⁰⁷ Roggio, Bill. *Pakistani Jihadists form Ahrar-ul-Hind, vow to continue attacks*. Long War Journal, February 2014 <http://bit.ly/2MurThP>

(ძირითადად „ისლამური სახელმწიფოს“ სასარგებლოდ). 2015 წლის მარტში თთპ-ს დროშის ქვეშ „ლაშქარ-ე-ისლამი“ („ისლამის ლაშქარი“) გაერთიანდა, რასაც „ლაშქარ-ე-ჯჰანგვის“ ნაწილების შემოერთება მოჰყვა. 2017 წელს ორგანიზაციაში დაბრუნდა მეჰსუდის ჯგუფი¹⁰⁸.

2014-2015 წლებში ავღანეთ-პაკისტანის საზღვარზე კიდევ ერთი, მძლავრი ტერორისტული ორგანიზაციის დანაყოფი გამოჩნდა ("ისლამური სახელმწიფო ხორასანში"/ISK)¹⁰⁹. ამან რეგიონში უკვე მოქმედ დაჯგუფებებს შორის კონკურენცია გაამძაფრა. უკვე კარგად დამკვიდრებული ჯგუფები (ავღანეთის თალიბანი, ჰაკანის ქსელი, LeT) ახლადგამოჩენილი ჯგუფის ამბიციებს მტრულად შეხვდნენ და საკუთარი გავლენის სფეროში ჩარევად აღიქვეს. ISK-მ თთპ-ში გაჩენილი უთანხმოებები თავის სასარგებლოდ გამოიყენა. ანტი-პაკისტანურად განწყობილმა ფრაქციებმა უფრო რადიკალური პოზიციის გასატარებლად "ისლამურ სახელმწიფოსთან" დაკავშირება არჩიეს. ISK-ს პირველ მეთაურად თთპ-ს ვეტერანი მებრძოლი, ჰაფიზ საიდ ხანი აირჩიეს, რომელსაც ზურგს შეიხ მაკბული (ჯგუფის სპიკერი) და თთპ-ს სხვა წევრები უმაგრებდნენ. 2017 წლისთვის ISK-ს ჰაკანის ქსელის, JuD-ის, LeT-ს და IMU-ს ათეულობით ყოფილი მუჯაჰიდი შეუერთდა¹¹⁰.

¹⁰⁸ Roggio, Bill. *Pakistani Jihadist Groups, Lashkar-e-Islam merge into the Movement of the Taliban in Pakistan*. Long War Journal, March 2015 <http://bit.ly/3294Pfu>

¹⁰⁹ Jadoon, Amira & Jahanbani, Nakissa & Willis, Charmaine. *Challenging the ISK Brand in Afghanistan-Pakistan Rivalries and Divided Loyalties*. Sentinel Vol. 11 (4), West Point: CTC, April 2018

¹¹⁰ *Islamic State Khorasan (IS-K)*. Terrorism Backgrounder, Center for Strategic and International Studies. <http://bit.ly/317okUp>

პაკისტანის კონტრტერორისტული სტრატეგია და პრაქტიკა

პაკისტანის სახელმწიფოს არასახელმწიფოებრივ აქტორებთან ბრძოლის ხანგრძლივი ისტორია აქვს (აღმ. პაკისტანის სეცესია, სეპარატიზმი ბელუჯისტანში, სექტარიანიული ჯგუფები პენჯაბში). კონიუნქტურიდან გამომდინარე, პაკისტანის მთავრობა (მისი სტრუქტურული ერთეულები) ზოგიერთ ასეთ ჯგუფთან თავად თანამშრომლობს¹¹¹ (ხშირად ხელსაც უმართავს)¹¹².

პაკისტანის ხელისუფლების ტერორიზმთან ბრძოლის პრაქტიკა როგორც პრევენციული, ისე რეპრესიული ხასიათისაა. პაკისტანის უსაფრთხოების ძალები (განსაკუთრებით ISI) ჰიბრიდული საფრთხის წინააღმდეგ სხვადასხვა ზომას მიმართავს: საპოლიციო რეიდები, უპილოტო საფრენი აპარატებით იერიშები, ე. წ. „თანდათანობით დაუძღურების“ (attrition) ტაქტიკა და სხვ¹¹³. აშშ-ს მხრიდან განეული დახმარების მიუხედავად, თავდაპირველად პაკისტანის კონტრტერორისტულმა სტრატეგიამ დასახულ მიზნებს ვერ მიაღწია¹¹⁴. 2001-2008 წლებში შეიარაღებულმა ძალებმა „დაუმორჩილებელ“ რეგიონებში ექსტრემისტული ჯგუფების ლიკვიდირება მხოლოდ ნაწილობრივ მოახერხეს. თთპ-ს სახით პაკისტანის მთავრობას არა დაქსაქსულ და მანიპულირებად მოძრაობასთან, არამედ მეტნაკლებად კოორდინირებულ ორგანიზაციასთან უწევდა დაპირისპირება. ამან სტრატეგიის გადასინჯვა ეროვნული უსაფრთხოებისთვის სასიცოცხლოდ აუცილებელი გახადა. განახლებული მიდგომა დასავლეთთან თანამშრომლობის გაძლიერებას და (ოპერაციების დაგეგმვისა და განხორციელების პროცესში) საზოგადოებრივი აზრის ფაქტორის გათვალისწინებას გულისხმობდა. 2009 და 2014 წლებში მასშტაბური ანტიტერორისტული კამპანიები სწორედ ამ გადასინჯვის ნაყოფს წარმოადგენს.

პაკისტანის ჩრდილო-დასავლეთში არეულობა სათავეს 2001 წელს ავღანეთში აშშ-ს ინტერვენციიდან იღებს. თორა ბორას ბრძოლის შემდეგ თალიბანის გადარჩენილი ორგანიზაციული სტრუქტურა პაკისტანში დაფუძნდა¹¹⁵, რასაც ხელისუფლებასთან მშვიდობიანი თანაარსებობის წლები მოჰყვა. თუმცა, პაკისტანის იმდროინდელ პრეზიდენტზე, გენერალ ფერვეზ მუშარაფზე თავდასხმებმა პაკისტანის მმართველ წრებს ბიძგი მისცა თალიბანის გავლენა შეეკვცა. პაკისტანის რეგულარული არმია, სახელმწიფოს ისტორიაში პირველად, ტრაიბალურ რაიონებში გადაისროლეს. 2002-2006 წლებში ჩატარებული კონტრტერორისტული ღონისძიებების კასკადი (რომლებიც, ერთობლივად „ალ-მიზანის“ სახელს ატარებენ)¹¹⁶ შეზღუდული ოპერაციული და ადამიანური რესურსებით გამოირჩეოდა. ძირითადი ტვირთი სპეციალური დანიშნულების ჯგუფს (SSG, სხვაგვარად „შინდისფერი ბერეტები“) ეკისრა, რომელსაც ზურგს გასამხედროებული ორგანიზაცია, სასაზღვრო კორპუსი (FC) უმაგრებდა.

¹¹¹ ე. წ. „სტრატეგიული სიღრმის“ ტაქტიკა იხ. <http://bit.ly/320HTPq>

¹¹² Khan, Sahar. *Double Game: Why Pakistan Supports Militants and resists U.S. Pressure to Stop*. Policy Analysis 849, Cato Institute, September 2018

¹¹³ *Revisiting Counter-terrorism Strategies in Pakistan: Opportunities and Pitfalls*. Brief 271, International Crisis Group, July 2015

¹¹⁴ Rashid, Ahmed. *Pakistan's Continued Failure to Adopt a Counterinsurgency Strategy*. Sentinel Vol. 2 (3), West Point: CTC, March 2009

¹¹⁵ John, Peter and Krause, Paul. *The Last Good Chance: A Reassessment of U.S. Operations at Tora Bora*. Journal of Security Studies 17, Taylor & Francis Group, 2008, გვ. 644-684

¹¹⁶ Khatwani, Mukesh K. and Abbasi, Ishrat A. *An Overview of Major Military Operations in Pakistan*. Journal of academic and Social Research, Vol. 1 (1), 2018

2004 წელს სამხრეთ ვაზირისტანში ჩატარებული ოპერაციის დროს ადგილობრივი ტომების (განსაკუთრებით აჰმედზაის) ლიდერები ჯიჰადისტურ ჯგუფებს თანაუგრძობდნენ (ალ-კაიდა, IMU). მაშინ, როცა SSG და FC ტერორისტთა გამაგრებული პოზიციების ალყაში მოქცევას შეუდგნენ, ისინი ნექ მუჰამადის ძალებით თავად აღმოჩნდნენ გარშემორტყმულები. რაზმის გადასარჩენად პაკისტანის არმიას ჩვეულებრივი ტიპის (conventional) შეიარაღების გამოყენება მოუხდა¹¹⁷ (მძიმე არტილერია, მოიერიშე შვეულმფრენები, გამანადგურებელი-ბომბდამშენები), რის შედეგადაც რეგიონის დიდი ნაწილი ინტენსიური ცეცხლის ქვეშ მოექცა. საბოლოო ჯამში, ოპერაცია „ქალოშა“ დიდი მსხვერპლით დასრულდა (უსაფრთხოების ძალების ორასამდე მოკლული თანამშრომელი, ოთხასამდე დაღუპული სამოქალაქო პირი, FC-ს რიგებში გავრცელებული დებერტირობა, 50 000-მდე იძულებით გადაადგილებული პირი)¹¹⁸. ამასთან, ოპერაციის წარმოების მეთოდებმა, რომლებიც პუშტუნთა ღირსების კოდექსს (პუშტუნვალი) ლახავდა, რეგიონში ხელისუფლების ავტორიტეტი გააცამტვერა. საპირწონედ, 2004 წელს გაფორმებულმა შაქაის შეთანხმებამ თალიბებს დროის მოგებისა და რესურსების აღდგენის საშუალება მისცა. პაკისტანის არმიის მიერ განცხდილი კრახი რამდენიმე ფაქტორით შეიძლება აიხსნას:

❖ **ე. წ. „განსხვავების პრინციპის“ უგულებელყოფა**

(რაც სამოქალაქო მოსახლეობის/ობიექტების კომბატანტებისგან გარჩევას გულისხმობს);

❖ **უსაფრთხოების წინასწარი ზომების მიუღებლობა**

(არ მოხდა მოსახლეობის ევაკუაცია საცეცხლე რაიონებიდან; დაზვერვის მოპოვებული მონაცემების სიმწირე);

❖ **გამოყენებული ძალის არაპროპორციულობა**

(საცეცხლე ძალის დამანგრეველმა ეფექტმა მნიშვნელოვნად გაზარდა „გვერდითი ზიანის“ (collateral damage) რისკები).

შემდგომში (2005, 2006, 2008 წლებში) პაკისტანი კონტრტერორისტული კამპანიები, ძირითადად, ცეცხლის შეწყვეტის შეთანხმებების დადებითად და ხანმოკლე დაზავებით შემოიფარგლებოდა, რაც პრობლემის სისტემური გადაწყვეტას გამორიცხავდა. შეიარაღებული კონფლიქტის მინელებამ FATA-ს “თალიბანიზაციას” შეუწყო ხელი. ვითარება მკვეთრად შეცვალა 2007 წელს „ლალ მასჯიდზე“ თავდასხმამ, რამაც წინააღმდეგობის ახალი ჯიჰადისტური ტალღა თავბრუდამხვევი სიჩქარით ააგორა. ამას თან ახლდა აშშ-ს „დრონებით“ საჰაერო დარტყმების მკვეთრი ზრდა (746 %-ით 2009 წელს 2005-თან შედარებით)¹¹⁹. მდგომარეობამ უკიდურეს წერტილს 2009 წლის გაზაფხულზე მიაღწია (იხ. თთპ სვატში), რასაც საერთაშორისო და შიდა საზოგადოების მხრიდან პაკისტანის ხელისუფლებაზე მძაფრი ზეწოლა მოჰყვა.

პაკისტანის შეიარაღებული ძალების უწინდელი მიდგომა რაოდენობრივად და ხარისხობრივად აღმატებულ მოწინააღმდეგეზე (ინდოეთის არმია) იყო მორგებული¹²⁰. ამ ტაქტიკის (მძიმე არტილერიითა და საჰაერო ძალებით მხარდაჭერილი სრულმასშტაბიანი სახმელეთო იერიში) გამოყენებას კონტრტერორისტული მიზნებით, არც თუ ისე იშვიათად, ადგილობრივი მოსახლეობისთვის დამანგრეველი შედეგები ჰქონდა (“out-terrorize the terrorist”).

¹¹⁷ Bergen, Peter & Tiedemann, Katherine (eds). გვ. 208-210

¹¹⁸ Ibid.

¹¹⁹ Ibid.

¹²⁰ *Revisiting Counter-terrorism Strategies in Pakistan: Opportunities and Pitfalls*. Brief 271, International Crisis Group, July 2015

უსაფრთხოებისა და თავდაცვის პაკისტანელმა ექსპერტებმა რამდენიმე საკვანძო ძირეული შეცდომა გამოყვეს: პრიორიტეტულ სამიზნედ მაღალი ღირებულების საშუალებების ამოღება (ე. წ. high-value targets); მსხვილმასშტაბიან ძალებზე (ოპერაციულ დანაყოფებზე) ჭარბი დამოკიდებულება; თავდაცვითი ძალების სტატიკურად დისლოცირება (გარნიზონების, საკონტროლო-გამშვები პუნქტების) სახით; მყისიერ სამხედრო მოქმედებებზე (direct-action) ფოკუსირება; ადგილობრივი მოსახლეობის რესურსის გამოყენებლობა (სასაზღვრო კორპუსისა და ლაშქრების სახით)¹²¹.

პაკისტანის ხელისუფლების ახალი სტრატეგია აშშ-ს მიერ ერაყის კამპანიის განმავლობაში დამუშავებული COIN-ის დოქტრინას¹²² დაეყრდნო. COIN-ის ძირითად მიზანს „მთავრობის [კონტრტერორისტული] პოლიტიკისა და ქმედებებისთვის მოსახლეობის მაქსიმალური მხარდაჭერის თავმოყრა და ტერორისტების მარგინალიზება“ წარმოადგენს¹²³. დოქტრინა „გვერდითი ზიანის“ შემცირების ზომების გატარებას, სახმელეთო ჯარების უპირატეს ძალად დისლოცირებას (საჰაერო ძალების მაგიერ), მცირე ზომის ოპერაციული ჯგუფების (საპატრულო, სადაზვერვო, ტექნიკური მხარდაჭერის) გამოყენებას ითვალისწინებს.

COIN-ის მოთხოვნების მიხედვით გადამუშავებული სტრატეგიის სამხედრო პრაქტიკაში დანერგვა ხარჯიან გამონვევას წარმოადგენდა. დროის ფაქტორისა და ორგანიზაციული ჩამორჩენის გარდა, თთპ-სთან დაპირისპირება ჰიბრიდული საფრთხის ტაქტიკის თანადროულმა ცვლილებამ გაართულა. თთპ-ს სხვადასხვა უჯრედებსა და ანკლავებს ფორსირებული თავდასხმის შემთხვევაში შეკავშირებისა და გადაჯგუფებისა უნარი შესწევდათ. ეს COIN-ის ღონისძიებათა ველს საგრძნობლად აფართოებდა და ხელმისაწვდომი ადამიანური და ტექნიკური რესურსის განლევას იწვევდა¹²⁴.

პაკისტანის არმიამ განახლებული სტრატეგია სვატის ოლქში ჩატარებული კამპანიისას („რაჰ-ე-რაასთ“) გამოცადა. ოპერაციის წარმატება მეტწილად ადგილობრივ და ცენტრალურ ხელისუფლებას შორის მჭიდრო თანამშრომლობაზე იყო დამოკიდებული¹²⁵. ტაქტიკურ დონეზე სიახლე გადანყვეტილებათა მიღების პროცესში ახალგაზრდა ოფიცრების როლის წინ წამოწევა იყო. სვატის რაიონებში, სათემო პატრულირება დაიწყო, რამაც ადგილობრივი მოსახლეობის ნდობა (არმიის მიმართ) გაზარდა. ღონისძიებათა ერთობლიობამ მნიშვნელოვნად შეამცირა ტერორიზმის ხელახალი ინფილტრაციის საფრთხე¹²⁶.

განსხვავებული გეოგრაფიული და დემოგრაფიული პირობებიდან გამომდინარე, სვატის ნიმუში შესაძლოა ნაკლებად ესადაგებოდეს FATA-ს. 2009 წლის შემოდგომით წამოწყებული ოპერაცია „რაჰ-ე-ნიჯათი“ მიზნად სამხრეთ ვაზირისტანში მეჭსუდთა თალიბანის კერების აღმოფხვრას ისახავდა¹²⁷. გენერალურმა შტაბმა ოლქში რეგულარული არმიის დივიზიები (სხვადასხვა შეფასებებით, 30 000-დან 60 000-მდე სამხედრო მოსამსახურე) გადაისროლა¹²⁸.

¹²¹ Bergen, Peter & Tiedemann, Katherine (eds). გვ. 211-212

¹²² counterinsurgency: მეამბოხეთა წინააღმდეგ მიმართულ ზომათა ერთობლიობა.

¹²³ Ibid.

¹²⁴ ეს განსაკუთრებით ავღანეთ-პაკისტანის საზღვარს ეხება, რომლის ცენტრალიზებული კონტროლისთვის ათასამდე საგუშაგო და პირადი შემადგენლობის 60 000-მდე სამხედრო სჭირდებოდა.

¹²⁵ ე. წ. „მოსახლეობაზე ორიენტირებული“ მიდგომა (population-centric approach), რაც კონტრტერორისტული ოპერაციების ველიდან ადგილობრივი მოსახლეობის ევაკუაციას, IDP ბანაკებში დაბინავებას და შემდგომ მათი უკან დაბრუნების უზრუნველყოფას მოიცავდა (თანმდევრი სოციალურ-ეკონომიკური მხარდაჭერის პაკეტით და თვითმართველობის გაუმჯობესებით).

¹²⁶ *Pakistan: Countering Militancy in Pata*. Asia Report 242, International Crisis Group, January 2013

¹²⁷ Hussain, Safdar. *Pakistan's Achievements in War on Terror but at What Cost*. Report, Pak Institute for Peace Studies, Islamabad, 2019, გვ. 10

¹²⁸ Bergen, Peter & Tiedemann, Katherine (eds). გვ. 215-17

პრიორიტეტული სამიზნის დასასუსტებლად, დამატებით აქტორებთან (აქ: მოლა ნაზირისა და ჰაფიზ გულ ბაჰადურის ფრაქციები) მოლაპარაკებების შედეგად მათი ნეიტრალიტეტის მიღწევა მოხერხდა. ამან ოპერაციის მსვლელობისას მთელი ძალისხმევა მეჭსუდების დაჯგუფებისგენ მიმართა. პაკისტანის არმიამ ფსიქოლოგიური ზეწოლისთვის, მოსახლეობაში ავტორიტეტული პაკისტანელი მუსლიმი სწავლულების სანქცირებული პროკლამაციები გაავრცელა (რომლებიც ახალგაზრდობას „მცდარი ჯიჰადისგან“ თავის შეკავებისკენ მოუწოდებდა და ბრალს უცხოელ მუჭაჰიდებს სდებდა). პაკისტანის შეიარაღებული ძალების სპეციალური დანიშნულების რაზმებმა (SSG) დაზვერვის მიერ მოპოვებული მონაცემებით,¹²⁹ მეჭსუდის კლანის წამყვანი წევრების ლიკვიდაცია შეძლეს.

2014 წელს პაკისტანის არმიამ კიდევ ერთი მასშტაბური ოპერაცია დაგეგმა, ამჯერად ჩრდილო ვაზირისტანში მოღონიერებული ტერორისტული კერის წინააღმდეგ (ოპერაცია „ზარბ-ე-აზბი“/“ბასრი დარტყმა“)¹³⁰. ოპერაციის დაწყებას წინ უსწრებდა KPP-ში სამვარსკვლავიანი გენერლის მკვლელობა, პაკისტანის სასაზღვრ კორპუსის 23 ჯარისკაცისთვის თავის მოკვება და ჯინას საერთაშორისო აეროპორტზე თავდასხმა. უწყებათშორისი დაზვერვის სამმართველოს ინფორმაციით, შეიარაღებული ძალების 30 000-მდე მობილიზებულმა მოსამსახურემ მოწინააღმდეგის 837-მდე სამალავის განადგურება და 2763 ექსტრემისტის ლიკვიდაცია შეძლო¹³¹. ოპერაციის ტაქტიკურ სუსტ წერტილს ავღანეთის მთავრობასთან თანამშრომლობის ნაკლებობა წარმოადგენდა, რის გამოც დაჯგუფების მრავალმა წევრმა სამშვიდობო ავღანეთის სამხრ.-აღმ. პროვინციებში გააღწია. ოპერაციის მნიშვნელოვანი თანმდევი გამოწვევა იძულებით გადაადგილებულ პირთა განსაკუთრებით დიდი რაოდენობა იყო (ერთ მილიონამდე სული).

¹²⁹ Ibid.

¹³⁰ Zulfqar, Saman. *An Overview of Pakistan's Security Situation after Operation Zarb-e-Azb*. Journal of Current Affairs Vol. 2 (1), IPRI, 2017

¹³¹ Javaid, Umbreen. *Operation Zarb-e-Azb. A Successful Initiative to Curtail Terrorism*. Journal of South Asian Studies, Vol. 30 (2), July-December 2015, გვ. 43-58

დანართი #1: ტერორისტული აქტების ქრონოლოგია¹³²

23 დეკემბერი, 2007: თთპ-ს თვითმკვლელი ტერორისტის თავს დაესხა სამხედრო ავტოკოლონას (კონვოი). (13 მოკლული, 25 დაშავებული)

27 დეკემბერი, 2007: პაკისტანის მთავრობამ თთპ დაადანაშაულა ბენაზირ ბჰუტოს მკვლელობის ორგანიზებაში. (თთპ ბრალდებას უარყოფს)

21 აგვისტო, 2008: თთპ-ს თვითმკვლელმა ტერორისტებმა დაბომბეს პაკისტანის უმსხვილესი იარაღის ქარხანა. (66 მოკლული, 70 დაშავებული)

10 ოქტომბერი, 2008: თთპ-ს თვითმკვლელმა ტერორისტმა თავი აიფეთქა ალი ზაის ტომის ხუთასამდე მეთაურის (მალიქი) შეხვედრისას, როდესაც თალიბანისთვის წინააღმდეგობის გასაწევად სახალხო „ლაშქრის“ შენაერთების ფორმირება განიხილებოდა. (85 მოკლული, 200 დაშავებული)

30 მარტი, 2009: თთპ-მ წევრები თავს დაესხნენ ლაჰორის პოლიციის სანვრთნელ აკადემიას. ბაითულა მეჰსუდის განცხადებით, ეს პაკისტანის მთავრობის მხარდაჭერილი აშშ-ს მიერ დრონებით (უპილოტო საფრენი აპარატებით) დაბომბვის საპასუხო ქმედება იყო. (10 მოკლული, 95 დაშავებული)

9 ოქტომბერი, 2009: ფეშავარის ბაზარში მანქანაში დამონტაჟებული ბომბი აფეთქდა. მიუხედავად იმისა, რომ თთპ-ს ოფიციალურად აქტზე პასუხისმგებლობა არ უღიარებია, პაკისტანის მთავრობამ ის არმიის მხრიდან სამხრეთ ვაზირისტანში თთპ-ს მთავარ ბაზაზე თავდასხმის პასუხად მიიჩნია. (125 მოკლული, 100-ზე მეტი დაშავებული)

30 დეკემბერი, 2009: თვითმკვლელი ტერორისტი თავს დაესხა ავღანეთში აშშ-ს სამხედრო ბაზას ბაითულა მეჰსუდის მკვლელობის სამაგიეროდ. (7 მოკლული, 6 დაშავებული)

1 იანვარი, 2010: თთპ-ს თვითმკვლელმა ტერორისტმა დანაღმული მანქანა ააფეთქა ლაქი მარვატის ოლქში, სადაც 400-მდე ადამიანი შეიკრიბა ხელბურთის მატჩის საცქერლად. (105 მოკლული, 100-ზე მეტი დაშავებული)

13 მაისი, 2011: თთპ-ს თვითმკვლელმა ტერორისტებმა ორჯერ ააფეთქეს პოლიციის კადეტთა სანვრთნელი ცენტრი ჩარსადაში. თთპ-ს სპიკერ ეჰსანულა ეჰსანის მტკიცებით, თავდასხმა ოსამა ბინ ლადენის მკვლელობაზე შურის საძიებლად განხორციელდა (98 მოკლული, 115 დაშავებული)

9 ოქტომბერი, 2012: თთპ-ს წევრმა იერიში მიიტანა სასკოლო ავტობუსზე და თავს დაესხა **მალალა იუსაფზაის**, ქალთა განათლების უფლების დამცველ გოგონას, რომელშიც თავში დაიჭრა. აღნიშნულ ინციდენტს დიდი საერთაშორისო გამომხაურება მოჰყვა.

26 ივლისი, 2013: თთპ-ს თვითმკვლელმა ტერორისტებმა ორი კოორდინირებული თავდასხმა განახორციელეს ქურამის ოლქის ერთ-ერთ ბაზარში შიიტების წინააღმდეგ. თთპ-ს მტკიცებით, ქმედება ერაყსა და სირიაში შიიტების მიერ სუნიტების შევიწროების შურისძიების მიზნით ჩაიდინეს. (60 მოკლული, 180 დაშავებული)

22 სექტემბერი, 2013: თთპ-ს თვითმკვლელი ტერორისტები თავს დაესხნენ ეკლესიას წირვის დროს ფეშავარში. თთპ-მ თავდასხმის საბაბად აშშ-ს მიერ „დრონებით“ დაბომბვა დაასახელა. (81 მოკლული, 145 დაშავებული)

¹³² retrieved from *Mapping Militant Organizations*. "TTP". Stanford University, July 2018. <https://stanford.io/2OATC3I>

8 ივნისი, 2014: თთბ-ს ათი მებრძოლმა ხუთსაათიან ალყაში მოაქცია მუჰამად ალი ჯინას სახელობის საერთაშორისო აეროპორტი კარაჩიში. თავდასხმაში მონაწილეობდნენ უზბეკეთის ისლამური მოძრაობის წევრებიც. (18 მოკლული, 26 დაშავებული)


16 დეკემბერი, 2014: თთბ-ს მეომრებმა იერიში მიიტანეს პაკისტანის არმიას დაქვემდებარებულ სკოლაზე, რასაც მოსწავლეების მასობრივი ხოცვა-ჟლეტა მოჰყვა (150 მოკლული, 114 დაშავებული).

27 მარტი, 2016: „ჯამა'ათ-ულ-აჰრარის“ (თთბ-ს ერთ-ერთი დაჯგუფება) თვითმკვლელი ტერორისტები თავს დაესხნენ ლაჰორის პარკში შეკრებილ ქრისტიანებს, რომლებიც აღდგომას აღნიშნავდნენ. (74 მოკლული, 300 დაშავებული)

8 აგვისტო, 2016: თთბ-ს თვითმკვლელმა ტერორისტებმა თავი აიფეთქეს ქუეთას სამოქალაქო საავადმყოფოს, სადაც ასობით ადამიანი იყო შეკრებილი ბელუჯისტანის ადვოკატთა ასოციაციის თავმჯდომარის, ბილალ ანუარ კასის მკვლელობის სამგლოვიაროდ. (74 მოკლული, ასი დაშავებული)

4 ივნისი, 2018: თთბ-ს მებრძოლმა ცეცხლი გაუხსნა „პუშტუნთა დაცვის მოძრაობის“ ყრილობას, რომელსაც ალი ვაზირი მეთაურობდა. (10 მოკლული, 30 დაშავებული)

დანართი #2: ტერორიზმის გლობალური ინდექსი¹³³



¹³³ Global Terrorism Index 2018: Measuring the impact of terrorism. Institute for Economics & Peace, Sydney, November 2018

დანართი #3: რეკომენდებული საკითხავი

Abbas, Hassan. *The Taliban Revival - Violence and Extremism on the Pakistan-Afghanistan Frontier*. Yale University Press, New Haven, 2014

Afzal, Madiha. *Pakistan Under Siege: Extremism, Society, and the State*. Washington D.C.: Brookings Institution Press, 2018

Ahmed, Khaled. *Sleepwalking to Surrender: Dealing with Terrorism in Pakistan*. Penguin Haryana: Random House India, 2016

Barker, Kim. *The Taliban Shuffle: Strange Days in Afghanistan and Pakistan*. Doubleday, 2011

Bergen, Peter & Tiedemann, Katherine (eds). *Talibanistan: Negotiating the Borders between Terror, Politics and Religion*. Oxford University Press, New York, 2013

Hussain, Mujahid. *Punjabi Taliban: Driving Extremism in Pakistan*. New Dehli: Pentagon Press, 2012

Murphy, Eamon. *The Making of Terrorism in Pakistan: Historical and Social Roots of Exremism*. Routledge, Oxon, 2013

Murphy, Eamon. *Islam and Sectarian Violence in Pakistan: the Terror Within*. Routledge, Oxon, 2019

Pakistan Security Report. Conflict and Peace Studies Vol. 11, Islamabad: Pak Institute for Peace Studies, 2019

Peters, Gretchen. *Crime and Insurgency in the Tribal Areas of Afghanistan and Pakistan*. West Point: Combating terrorism Center, October 2010

Sheikh, Mona K. *Guardians of God: Inside the Religious Mind of the Pakistani Taliban*. New Delhi: Oxford Univeristy Press, 2016